

## Bìac Mahno Da Chuaq Jêxu Crich Am Ca Jon Achih Bàu Patô Adroi

*Hiniq wa Bàu Xèm Da Sech:*

Jò cô mangai broq gàu ta Diac Rôma baxèm ep diq ca jàn ep cùh waiq bùa Rôma tiah ca cùh waiq Boc Plinh. 'Màng aih mangai lùì Chuaq Jêxu joq Chuaq Wèq Cwìang Dìq Dõng, baxèm glàm bìac padit padiang. I 'nah ngai ta Tagop Hadròih yùq, hi khoi wì haq enh pajùm wa broq tiaq con jàn enh gùng Tagop Hadròih. 'Màng aih, Jon wa mangai hnài ma 'noi q nhet achih thò pariaq hnài mangai ta Tagop Hadròih phai yòng cajap tiaq Chuaq diq ca manoh.

*Mangai Achih wa Hanam Achih:*

Jon mangai achih. Jon cô oh da Chuaq Jêxu pah mòiq miq. Haq achih Sech cô hanam 95 Atiq C.

*Bàu Anoi:*

Jon achih ca mangai lùì Chuaq ep yòng cajap paq cùh waiq bùa Diac Rôma. Haq pa'noh bàu padon i bìac tajêh poh ta'ne Boc Plinh wa can kiac Satan. Can kiac Satan enh padit padiang mangai lùì Chuaq, mahaq wì haq phai yòng cajap trùh cachit. Chuaq jah wèq ban dèch mahua yiang jah atóc ta plinh òi hloi hloi ti Chuaq Jêxu.

*Rìm 'Nat:*

1. Chuaq Jêxu Yòng Ta'ne Tapèh Tagop Hadròih: 1:1–20
2. Thò Gòi ca Tapèh Toq Tagop Hadròih: 2:1–3:22
3. Gèq Bùa, Xom Jàiq wa Trìu Con: 4:1–5:14
4. Tapèh Toq Clep Baxìa: 6:1–8:1
5. Tapèh Toq Ken: 8:2–11:19
6. 'Bài Hiniq wa Bìac Broq Loh: 12:1–14:20

7. Tapèh Toq Doi Chrõng: 15:1—16:21
8. Ba-bi-lôn – Gu Cadri Tango: 17:1—19:5
9. Ta'nèp Da Trìu Con: 19:6–10
10. Chuaq Jêxu Tawìh Hlài: 19:11–21
11. Mòiç Ngõng Hanam: 20:1–6
12. Can Kiác Satan 'Bìç Jêh Đac: 20:7–10
13. Gèç Bùa Càn Caiç Taboc: 20:11–15
14. Diac Plình Neo; Cřõng Taneh Neo; Jê-ru-sa-lem Neo: 21:1—22:5
15. Bàu Pulùch: 22:6–21

<sup>1</sup> Cô bìac mahno loh da Chuaq Jêxu Crich ma Boc Plình am ca Haq ðòiç anoi 'noh ca 'bài hapõng Haq bìac ten trùh. Haq thê 'bình plình Haq anoi 'noh bìac mahno cô ca Jon. <sup>2</sup>Jon anoi hlài ðõng ðìç bàu da Boc Plình wa bìac anoi hlài da Chuaq Jêxu Crich, aih ðìç ca bìac haq khi hnoç. <sup>3</sup>Xôç ramõt ca mangai ma ðõc, mangai ma tàng wa mangai ma broç tiaç bàu loç adroi ta sech cô, ma jah 'màng aih bìac cô khi ten trùh.

*Bàu hmàih ca Tapèh Tagop Hadròih*

<sup>4</sup> Au cô Jon,

Achìh thờ cô gòi ca tapèh toq Tagop Hadròih ði ta Asi:

Waiç xìn Boc Plình am ca pì bìac am dech, bìac catèm loh enh Haq ma manàiq 'nang i, wa khi i hloi hloi enh nèh, èh lam trùh, wa loh enh Yiang Hadròih enh ngìa ca gèç bùa Haq, <sup>5</sup>wa hadai loh enh Chuaq Jêxu Crich, Haq ma wèç ðèh bàu anoi hlài. Haq Con Ramua rìh hlài enh can cachìt, wa Haq broç Bùa ðìç ca wì ma broç bùa ði cřõng taneh.

Haq loç waç ca bèn, 'nheo manoh bèn wa lèh ca'naih bèn loh khi enh tòiç lòi xam mahem Haq, <sup>6</sup>èh Haq khi broç bèn wìa mòiç Taneh Diac broç pajàu ðòiç patìh ca Boc Plình, aih Baç Haq. Waiç xìn ðìç ca 'ngah 'ngai wa cwìang itai ði ta Haq hloi hloi, Amen.

<sup>7</sup> “Ngan oq, Haq lam trùh ti yùc plính;”<sup>☆</sup>

“Rìm ngai jah hnoq Haq,  
Wì ma bìt Haq hadai.”

Dìq dǒng mangai ǒi crǒng taneh “jah crò hmoi loh ca  
mango jò wì hnoq Haq,”<sup>☆</sup>

Joq 'nàng 'màng aih, Amen.

<sup>8</sup> Chuaq, Haq Boc Plính, doi: “Au cô Anpha wa Ô-mê-ga,  
aih Baxèm wa Pulùch; aih Haq ma manàiq 'nang i, khoi i  
hloi hloi enh nèh, wa padon lam trùh, Chuaq I Cwìang Itai  
Dìq Dǒng.”

*Bìac Mahno ta Pleo Patmôt*

<sup>9</sup> Au cô Jon, oh daq pì i pajùm ca pì ma chiùq bìac nan xa  
wa bìac chiùq àt gòm da Chuaq Jêxu Crich wa Diac Haq. Au  
ǒi tù ta pleo Patmôt taiq au hnài bàu Boc Plính wa taiq anoi  
hlài bìac Chuaq Jêxu Crich. <sup>10</sup> Hì da Chuaq, jò 'nang cùh  
waiq, au jah Yiang Hadròih wèq manoh au, au tàng enh  
rù ca au bàu anoi creo tìah ca atêh ken hlôi, doi: <sup>11</sup> “Phai  
achih ta sech dǒng dìq bìac ìh ma hnoq, gòi am ca tapèh  
toq Tagop Hadròih: Ta Ê-phê-sô, Si-mò-na, Betgam, Thi-  
a-ti-ra, Satđe, Phi-la-đen-phi, wa Lao-đi-xê.”

<sup>12</sup> Au wìh hlài ngan thù bàu anoi leq ma doi ca au. Bu  
wìh hlài, au hnoq tapèh toq long đen broq xam wang. <sup>13</sup> ǒi  
ta 'ne 'bài long đen aih, au hnoq i mangai tìah ca Con  
Mangai, caxùnh eo yôh trùh ta jènh wa cật caxi xam wang  
jang ca 'nam. <sup>14</sup> Xàc gàu Haq taboc tìah ca xàc con trùu,  
taboc tìah ca capaih, mat Haq tìah ca pla ùnh. <sup>15</sup> Baiq toq  
jènh Haq 'ngah raho tìah ca ðùng ma bùh 'nang yǒih enh  
tanùh, bàu Haq capoch tìah ca atêh diac còi càn. <sup>16</sup> Tì pah  
'ma haq wê tapèh toq halǒng plính, ta hacùng Haq i chang  
gùm hin loh baiq mản, hadrò Haq 'ngah tìah ca mat mahì  
xreo ma dèh jò 'ne hì.

<sup>☆</sup> 1:7 1:7 Đan 7:13. <sup>☆</sup> 1:7 1:7 Xach 12:10.

<sup>17</sup> Bu hnoq Haq, au tacro ta jènh Haq tìah ca mangai cachit, mahaq, Haq òoiq tì pah 'ma haq ti chac au, Haq doi: “Apaq yùq, Au cô Baxèm wa Pulùch, <sup>18</sup> Chuaq ma i can rìh hloi hloi. Au khoi cachit, mahaq ngan cô, Au rìh hloi hloi. Au wê chĩa khwaq can cachit wa nòi cachit.

<sup>19</sup> “ 'Màng aih, Au thê ìh achìh rìm bìac ìh ma khoi hnoq, bìac ma i manàiq, wa bìac ma jah trùh atìq cô èh. <sup>20</sup> Cô bìac halac halùai da tapèh toq halǒng ìh ma khoi hnoq ta tì pah 'ma Au, wa tapèh toq long ðen broq xam wang: Tapèh toq halǒng plình, aih tapèh ngai 'bình plình ma wèq tapèh toq Tagop Hadròih, wa tapèh toq long ðen, aih tapèh toq Tagop Hadròih.

## 2

### *Ê-phê-sô: Tagop Hadròih Thiuq Can Loq Waq*

<sup>1</sup> “ìh phai achìh thò ca 'bình plình ma wèq Tagop Hadròih òi ta Ê-phê-sô, doi:

Cô bàu doi da Haq ma wê tapèh toq halǒng plình ta tì pah 'ma, Haq ma lam ta'ne tapèh toq long ðen wang.

<sup>2</sup> Au loq bìac xalep ìh ma broq wa bìac chiùq àt da ìh, ìh ùh ta'nhùa mangai dù, ìh khoi ngan thù 'bài mangai ma doi ðađeh broq sùq ðô Chuaq, mahaq ùh xài, èh ìh khoi hnoq wì capoch amòng. <sup>3</sup> ìh khoi chiùq àt, chiùq xalep taiq hiniq Au, ùh hĩaq tagah lep.

<sup>4</sup> Mahaq i bìac Au lech ca ìh, taiq ìh pi loq waq ca Au tìah ca jò baxèm. <sup>5</sup> Au thê ìh hmàng hlài ìh ma khoi tacro aih enh nòi leq, cađac dèh manoh broq tòi q beq, broq hlài bìac 'màng ca ìh khoi broq jò baxèm. Tàng ùh broq 'màng aih, Au trùh ti ìh yóc long ðen 'noh enh nòi haq tàng ìh ùh cađac dèh manoh broq tòi q. <sup>6</sup> Mahaq

ìh i mòiq nà ma lem, aih ìh git ca bìac broq da mangai Ni-cô-la ma Au hadai git.

<sup>7</sup> Mangai leq i don phai tamàng bìac Yiang Hadròih ma doi ca rìm Tagop Hadròih: Mangai leq ta'blêq, Au am ca haq caq plì da long can rìh òi ta Wùan Boc Plình.

*Si-mò-na: Tagop Hadròih Chìuq Ti Rùp*

<sup>8</sup> “Ìh phai achìh ca 'bình plình da Tagop Hadròih Si-mò-na 'màng cô:

Haq ma Baxèm wa Pulùch ma khoi cachìt wa khoi rìh hlài, Haq doi 'màng cô: <sup>9</sup> Au loq ìh ma chìuq bìac nan xa. Au loq ìh mangai pa, (mahaq ma joq 'nàng ìh mangai can padrǒng) wa bàu da mangai ma jù lê ìh èh doi dađeh mangai Yothaiq, mahaq ùh xài; wì òi ta hnem tagop da can kiac Satan. Cô yi lem ùh? <sup>10</sup> Apa q yùq bìac chìuq nan xa padon loh ca ìh. Joq 'nàng kiac Satan padon clêh mòiq 'nah ngai ma òi ta pì 'mùt ta hnem tù, baxa thù pì 10 hì đòiq ngan thù manoh pì 'màng leq. Pì phai wèq dèh manoh trùh jò cachìt, èh Au jah am ca pì cadoh bùa da can rìh.

<sup>11</sup> Mangai leq i don, phai tamàng bìac Yiang Hadròih ma doi ca rìm Tagop Hadròih: Mangai leq ta'blêq, can cachìt yàng baiq ùh jah rùp haq.

*Betgam: Tagop Hadròih Baiq Manoh*

<sup>12</sup> “Ìh phai achìh thò ca 'bình plình ta Tagop Hadròih Betgam, doi:

Cô bàu doi da Haq i chang gùm hin baiq toq màn.

<sup>13</sup> Au loq nòi ìh ma òi, i gèq bùa can kiac Satan òi ta aih: Ta 'bài hì ma An-ti-ba, mangai wèq dèh manoh tiaq Au wa anoi hlài bìac Au, khoi 'bìq jêh cađac òi ti nòi can

kiac Satan ma òi, mahaq ìh xôq wèq cajap hiniq Au wa ùh cađac manoh ma lúi Au.

<sup>14</sup> Mahaq i toq 'biaq bìac Au lech ca ìh, taiq òi ti ìh i mangai ma tiaq đaoq Ba-la-am, mangai ma hnài Balac trong đòiq broq ca wì haq padô mangai Is-ra-ên tacro, caq jam tadreo ca 'mù, wa tango anang. <sup>15</sup> Ta ìh hadai i mangai ma tiaq trong Ni-cô-la. <sup>16</sup> Pì phai cađac dèh manoh broq tôiq lôi beq; tàng ùh, èh Au renh trùh ti ìh, Au tabroq tajêh ca wì xam pla chang gùm òi ta hacùng Au tabroq ca wì.

<sup>17</sup> Mangai leq i don, phai tamàng beq bìac Yiang Hadròih ma doi ca rìm Tagop Hadròih: Mangai leq ma ta'blêq, Au am ca haq caq mana 'nang cadoc hlèp. Au am ca haq hmu taboc, ta hmu aih i achìh hiniq neo, enh gùng ca mangai ma nhàn yốc ùh i ca mangai leq loq.

*Thi-a-ti-ra: Tagop Hadròih Manhài Trài*

<sup>18</sup> “Ìh phai achìh thò ca 'bình plình ma wèq Tagop Hadròih òi ta tagop Thi-a-ti-ra 'màng cô:

Cô bàu doi da Con Calô Boc Plình Haq ma i mat tìah ca pla ùnh, wa jènh Haq 'ngah tìah ca đùng ma bùh 'nang 'ngah raho, Haq doi: <sup>19</sup> Au loq bìac broq da ìh, can loq waq da ìh, manoh lúi Boc Plình da ìh, bìac patìh da ìh, manoh chiuq àt da ìh, wa bìac broq da ìh manàiq cô bàc yi hnao ca bìac broq adroi.

<sup>20</sup> Mahaq au lech ca ìh, taiq ìh ta'nhùa mangai cadrì Jê-sa-bên, haq ma doi dađeh mangai capoch bàu loq adroi; haq hnài wa padô 'nùt hapõng Au lam lac, broq manhài trài wa adrác wì caq jam tadreo ca 'mù. <sup>21</sup> Au gòm haq wìh hlài cađac dèh manoh broq tôiq lôi mahaq haq ùh enh tawìh, ùh cađac dèh trong tango anang.

<sup>22</sup> Joq 'nàng Au hwenh cađac haq ta jùang jìq xa wa broq

wì ma tango ti haq chiùq jìq xa dìq ca jaq tàng wì haq ùh tawìh cađac tôiq aih. <sup>23</sup> Au jah jêh cađac con caiq haq. Rìm Tagop Hadròih jah loq, Au ngan hnoq manoh cliac rìm ngai, èh Au ca'naih hlài ca rìm tang ngai hi mac ca bìac wì haq khoi broq.

<sup>24</sup> Mahaq Au doi ca pì ma òi ta Thi-a-ti-ra, pì ùh tiaq bàu hnài cô, pì ùh 'nì ca bìac ma wì creò bìac jrùq hlèp da can kiac Satan, Au ùh am ca pì pòq trap bìac ma 'noiç hòm. <sup>25</sup> Mahaq bìac pì ma khoi i, pì phai rùp ma cajap, trùh jò Au wìh hlài.

<sup>26</sup> Mangai leq ta'blêq, wèq bìac au trùh jò atìq lùch, Au jah am ca haq wèq cwìang òi ta rìm Diac. <sup>27</sup> 'Haq jah rùp long dùì xam mem broq bùa wì, blai wì padah tìah ca doi chrõng padah; <sup>28</sup> hadai 'màng ca Au i cwìang itai Baq Au ma khoi am wa Au jah am ca haq halõng daxroq. <sup>29</sup> Mangai leq i don, phai tamàng bìac Yiang Hadròih ma doi ca rìm Tagop Hadròih.

### 3

#### *Satđe: Tagop Hadròih Khoi Cachit*

<sup>1</sup> “Ìh phai achìh ca 'bình plình ma wèq Tagop Hadròih òi ta Satđe 'màng cô:

Cô bàu doi da Haq ma i tapèh toq phàn da Yiang Boc Plình, wa tapèh toq halõng. Au loq bìac ìh ma broq. ìh i 'bang tiàng tìah ca rìh, mahaq ìh cachit. <sup>2</sup> ìh phai rìu, phai ngan, phai broq ma dèh bìac ma òi hlài 'nhòq hìaq cachit: Ma jah 'màng aih Au hnoq bìac ìh broq, ùh tòm gèh enh ngìa ca Boc Plình Au. <sup>3</sup> 'Màng aih ìh phai hmàng hlài bìac khoi nhàn wa khoi tàng 'màng leq, èh wèq bìac aih wa cađac dèh manoh broq tôiq lôì beq.

☆ 2:27 2:27 BCP 2:9.

Tàng ìh ùh rìu ngan, Au jah lam trùh ti ìh tìah ca mangai atùng, ìh ùh 'nì jò leq Au trùh ti ìh.

<sup>4</sup> “Mahaq òi ti Satđe ìh xôq i toq 'biaq ngai ùh hìaq broq amùà dèh ca eo yôh. Wì jah caxùnh eo taboc lam ti Au taiq wì haq tajì dèh ca bìac aih. <sup>5</sup> Mangai leq ta'blêq, haq jah caxùnh eo taboc 'màng cô; Au ùh cađac hiniq wì haq loh enh Sech Can Rìh, mahaq au jah anoi hlài hiniq haq enh ngìa ca Baq Au wa enh ngìa ca 'bình plình da Haq. <sup>6</sup> Mangai leq i don, phai tamàng bìac Yiang Hadròih ma doi ca rìm Tagop Hadròih”.

*Phi-la-đen-phi: Tagop Hadròih Loq Wèq Dèh Manoh*

<sup>7</sup> “Ìh phai achìh ca 'bình plình ma wèq Tagop Hadròih òi ta Phi-la-đen-phi:

Cô bàu da Haq ma Hadròih wa wèq bàu joq 'nàng, Haq ma wèq chĩa khwaq da Đawit; jò Haq clenh, ùh i ca mangai jah pèh. Jò Haq pèh, ùh i ca mangai leq jah clenh. <sup>8</sup> Au loq bìac ìh ma broq. Cô, Au khoi pèh 'màng enh ngìa ca ìh, ùh i mangai leq jah clenh. Au loq ìh i can dèh toq 'biaq, ìh khoi wèq Bàu Au wa ùh hìaq chòiq ca hiniq Au. <sup>9</sup> Joq 'nàng Au thê wì òi ta tagop kiac Satan ma doi dađeh mangai Yothaiq, mahaq ùh xài, taiq wì capoch amòng. Au jah 'ràng wì haq trùh ta ìh, hacùn cràng enh jènh ìh waq ca wì haq loq Au khoi loq waq ca ìh. <sup>10</sup> Taiq ìh khoi wèq bàu thê Au dràng cajap, 'màng aih au wèq ìh claih ca jò baxa thù, aih jò òi q baxa thù òi q đống mangai rìh ta crống taneh.

<sup>11</sup> Au renh trùh ta crống taneh, ìh phai wèq ma cajap bìac ìh ma khoi i, yùq i mangai ma 'noi q loq yóc cadoh bùa da ìh. <sup>12</sup> Mangai leq ma ta'blêq, Au broq haq tìah ca long jrang òi ta hnem cùh waiq Boc Plình Au, haq ùh loh enh gùng hòm. Au jah achìh hiniq Boc Plình Au òi



ta haq, wa hiniq phôq Boc Plình Au, aih Jê-ru-sa-lem ma neo loh enh plình. Au hadai achih hiniq neo Au ta haq.  
<sup>13</sup> Mangai leq i don, phai tamàng bìac Yiang Hadròih ma doi ca rìm Tagop Hadròih.

*Lao-đi-xê: Tagop Hadròih Ha-õn*

<sup>14</sup> “Ìh phai achih ca 'bình plình ma wèq Tagop Hadròih òi ta Lao-đi-xê 'màng cô:

Cô bàu da Haq ma i hiniq Amen. Aih Haq anoi hlài bàu joq 'nàng, Haq ma calah baxèm broq plình crõng taneh. Mangai aih doi: <sup>15</sup> Au loq bìac broq da ìh, ìh ùh hangeo, hadai ùh tôq; Au enh ìh hangeo loq tôq. <sup>16</sup> Taiq ìh ha-õn, ùh hangeo hadai ùh tôq ma jah au padon gahiac 'noh đac ìh loh enh hacùng Au. <sup>17</sup> Taiq ìh doi: ‘Au padrõng can, au khoi wìa padrõng can,’ au ùh nhet ca bìac cleq hòm, mahaq ìh ùh 'nì ìh pahamoq, ìh mangai chiuq xalep, mangai pabôn, ùh xao mat, wa òi rahòng. <sup>18</sup> Au pariaq hnài ìh rõt wang khoi bùh hreo ta ùnh da Au, jah broq padrõng can joq 'nàng, rõt eo yôh taboc jah caxùnh, ùh hìaq rahòng, rõt jreo xùt ta mat đòiq jah hnoq ro.

<sup>19</sup> Mangai leq Au loq waq, Au lech wa baxa hnài haq, ma jah 'màng aih ìh yõc manoh panim wa cađac dèh manoh broq tôiq beq! <sup>20</sup> Cô, Au yòng enh gùng ca 'mang wa clôq 'mang; tàng i mangai leq tàng bàu Au, pèh 'mang, Au mùt ti mangai aih acaq ti haq wa haq caq ti Au.

<sup>21</sup> Mangai leq 'blêq, Au thê haq ha'ngui ti Au òi ta gèq bùa Au, 'màng ca Au hadai khoi ta'blêq, khoi ha'ngui ti Baq Au ta gèq bùa Haq. <sup>22</sup> Mangai leq i don, phai tamàng bìac Yiang Hadròih ma doi ca rìm Tagop Hadròih.”

## 4

*Jon Hnoq Gèq Bùa Ta Diac Plình*

<sup>1</sup> Khoi èh, au hnoq i 'mang òi khoi pèh ta plình. Au tàng bàu yàng baxèm tìah ca atêh ken capoch tùang ca au, doi: “Tòc ta cô beq! Au jah am ca ìh hnoq bìac ma phai loh atìq bìac cô.” <sup>2</sup> Tajòì 'mòi Yiang Hadròih wèq manoh au. Au hnoq Gèq Bùa òi ta plình, i mòiq Ngai ha'ngui ti aih. <sup>3</sup> Haq ma ha'ngui ta gèq bùa aih, xreo 'ngah tìah ca hmu ngóc xenh wa ngóc gòh. Wawenh ca gèq bùa i hadong xreo 'ngah tìah ca hmu xenh nget. <sup>4</sup> Wawenh ca gèq bùa aih i 24 toq gèq bùa, wa i 24 ngai craq broq gàu ha'ngui ti 'bài gèq bùa aih, caxùnh eo taboc, côi cadoh bùa broq xam wang. <sup>5</sup> Enh gèq bùa i camlet 'lìch 'lìch, i plình hilùng wa plình cađah. Enh ngìa ca gèq bùa i tapèh toq đen 'nang cheo dèh, aih tapèh toq phàn da Yiang Boc Plình. <sup>6</sup> Enh ngìa ca gèq bùa, tìah ca diac raxìq broq xam gùang, tìah ca hmu ramong hliang.

Ta'ne wa òi wawenh ca gèq bùa, i pôn ngè rìh, i chac bìnham mat enh ngìa, enh rù hadai. <sup>7</sup> Ngè rìh ma mòiq tìah ca baco hlari, ngè ma baiq tìah ca 'bo bu chuai, ngè piq i hadrò tìah ca mangai, ngè ma pôn tìah ca cliang 'nang pan. <sup>8</sup> Wì pôn ngè rìh, rìm toq i tadràu toq panan; òiq ca chac i mat enh gùng wa enh trom; dahì damang wì haq ùh padài, doi:

“ ‘Boc Plình Hadròih, Hadròih, Hadròih,  
I Cwìang Itai Dìq Dǒng,’<sup>☆</sup>

baxèm khoi i, manàiq 'nang i, wa atìq èh trùh!”

<sup>9</sup> Jò wì pôn toq ngè rìh padèch ha'nheq manè apôi Haq ma ha'ngui ta gèq bùa, aih Haq ma rìh hloi. <sup>10</sup> Èh wì 24 ngai craq broq gàu bla-op enh ngìa ca Haq ma ha'ngui ta gèq bùa wa cùh waiq Haq ma rìh hloi hloi, hi khoi wì òòi

<sup>☆</sup> 4:8 4:8 Êsai 6:3.

cadoh bùa dađeh ta taneh jang ngĩa ca gèq bùa. Wì haq doi:

<sup>11</sup> “Waiq Chuaq Boc Plinh da nhèn,

ìh tajì òiđiq jah nhàn can 'ngah 'ngai lem linh wa cwìang itai;

Ma jah 'màng aih ìh khoi broq loh rìm bìac;

Rìm bìac aih khoi jah i tiaq manoh enh da ìh.”

## 5

### *Sech Canua Ôi rôm i Tapèh Toq Clep Baxìa*

<sup>1</sup> Au hnoq òi ta tì pah 'ma Haq ma ha'ngui ta gèq bùa, i sech canua khoi achìh baiq pah; sech cô khoi baxìa xam tapèh toq clep baxìa. <sup>2</sup> Au hnoq mòiq 'bình plinh ma tadêh creo bàu dêh bòch: “Cabô ma tajì òiđiq dôiđi 'bài clep baxìa wa pèh sech cô?” <sup>3</sup> 'Nhac ca òi ta plinh, òi ta crõng taneh, loq enh 'neq ca crõng taneh, ùh i ca cabô leq jah pèh wa nui ngan sech cô! <sup>4</sup> Au hmoi ua-ac loh diac mat bàc, taiq ùh i ca mangai leq ma tajì òiđiq pèh sech wa ngan sech cô. <sup>5</sup> I mòiq ngai craq broq gàu doi ca au: “Apaq hmoi! Ngan cô, Baco Hlari da hadròng hadrech Juđa, enh riah Đawit, khoi ta'blêq. Haq jah pèh sech canua wa lèh tapèh toq clep baxìa.”

<sup>6</sup> Èh au hnoq òi ta'ne gèq bùa wa pôn toq ngè rìh wa 'bài craq broq gàu, Trìu Con yòng, tìah ca khoi 'bìq jêh cachìt, i tapèh toq aki, tapèh toq mat, aih patô tapèh Yiang Boc Plinh ma Haq khoi thê loh jàp ta crõng taneh. <sup>7</sup> Trìu Con aih lam trùh yõc sech enh tì pah 'ma Haq ma ha'ngui ta gèq bùa. <sup>8</sup> Jò Haq bu yõc sech, wì pôn toq ngè rìh wa 24 ngai craq broq gàu, bla-op ta taneh enh ngĩa ca Trìu Con, rìm ngai i wê broc wa abôq wang tah bình jreo xua thùm, aih bàu waiq khàn da wì mangai hadròih. <sup>9</sup> Wì calêu manè 'bõi ma neo, doi:

“ìh tajì òiđiq yõc sech,

dõih 'bài clep baxìa,  
 taiq ìh khai chiùq cachìt  
 yõc dèh mahem òiòiq rõt hlài  
 enh tôiq lôì 'bài mangai rìm nòi, rìm bàu capoch, rìm  
 hadròng, wa rìm Diac ahlài ca Boc Plình,  
<sup>10</sup> broq ca wì haq jah wìa mangai bùa wa mangai pajàu am  
 ca Boc Plình,  
 èh wì jah wèq cwìang òi crõng taneh.”

<sup>11</sup> Jò aih au ngan, èh tàng bàu bàc 'bình plình wawenh ca  
 gèq bùa, pôn nèg rìh, wa 'bài craq broq gàu, i 10.000 yàng  
 10.000, wa bàc ngõng yàng bàc ngõng, <sup>12</sup> doi bàu dèh:

“Trìu Con ma khai chiùq jèh cachìt,  
 tajì yõc cwìang itai, can padrõng, khôn rabiaq, can  
 dèh,  
 ðang ca atõc 'bang can 'ngah 'ngai lem lình wa xôq  
 ramõt!”

<sup>13</sup> Au tàng rìm hiniq ma khai jah broq loh òi ta plình, òi  
 ta crõng taneh, enh 'neq ca crõng taneh, òi ta diac raxìq  
 wa rìm hiniq enh trom ca aih, wì haq doi:

“Xôq ramõt, can loq iu, 'ngah 'ngai lem lình  
 wa cwìang itai òiòiq ðõng jah Haq ma ha'ngui ta gèq  
 bùa,  
 wa Trìu Con mạ rìh hloi hloi.”

<sup>14</sup> Wì pôn nèg rìh doi: “Amen.” Baiq jàt pôn ngai craq broq  
 gàu bla-op enh ngìa cùh waiq Haq.

## 6

### *Clep Baxìa Yàng Mòiq*

<sup>1</sup> Au ngan hnoq jò Trìu Con dõih mòiq clep baxìa ma  
 baxèm ta tapèh clep baxìa, au tàng mòiq ta pôn nèg rìh  
 capoch bàu dèh, tìah ca plình cadah, doi: “Trùh beq!”

<sup>2</sup> Au ngan hnoq mòiq toq axêh taboc. Mangai còi axêh  
 wê mòiq toq panenh, wa khai am ca haq mòiq toq cadoh

bùa, hi khoi haq lam tìah ca mangai 'nang 'blêq òiđiq hi wèq cwiàng lam pàng leq, jah 'blêq pàng aih.

*Clep Baxìa Yàng Baiq*

<sup>3</sup> Jò Haq òiđih clep baxìa ma baiq, au tàng nè rìh ma baiq, doi: “Lam ta cô beq!” <sup>4</sup> I mòiq axêh gòh loh. Mangai ma còi axêh aih jah am ca haq cwiàng yóc cađac can catèm khoi enh crống taneh, hi broq ca wì tajêh dabau. Hi khoi i mangai am ca haq mòiq pla chang gùm càn.

*Clep Baxìa Yàng Piq*

<sup>5</sup> Jò Haq òiđih clep baxìa ma piq, au tàng nè rìh ma piq, doi: “Trùh beq!” Au ngan hnoq mòiq toq axêh gam. Mangai ma còi axêh, tì haq wê mòiq toq maiq càng. <sup>6</sup> Au tàng bàu ta'ne wì pôn nè rìh: “Baiq long phi mì rôt xam 'bac baha mòiq hì abroq, tadràu long phi 'mau mat rôt xam 'bac baha mòiq hì abroq, hi khoi, dầu wa alac apaq broq raliang.”

*Clep Baxìa Yàng Pôn*

<sup>7</sup> Jò Triu Con òiđih clep baxìa ma pôn, au tàng bàu capoch da nè rìh ma pôn, doi: “Trùh beq!” <sup>8</sup> Au ngan hnoq mòiq toq axêh xenh bah bah. Haq ma còi axêh aih i hiniq Can Cachit, wa i Nòi Cachit tiaq atìq. Khoi jah am ca haq cwiàng itai jêh cađac mòiq phàn pôn mangai crống taneh, xam chang gùm, xam pangot hrah, xam can hiniq ùh hróc, wa xam nè ma dù ta rôm.

*Clep Baxìa Yàng Padam*

<sup>9</sup> Jò Triu Con òiđih clep baxìa ma padam, au hnoq enh 'neq ca ca'bông tadreo, i mahua yiang wì ma khoi chiùq jêh taiq wì haq iu bàu Boc Plình, wa taiq wì anoi hlài bàu Chuaq Jêxu Crich. <sup>10</sup> Wì creò bàu dêh: “Waiq Chuaq, ìh Hadròih wa joq 'nàng, ìh gòm dùnh dàng leq hòm, ìh ma ùh baxa chau wa ùh hadrah wì ma òi crống taneh, wì ma

khôi ùc loh mahem nhèn?" <sup>11</sup> Èh i mangai am ca wì haq mòiq ngai mòiq blah eo yôh taboc, khôi i bàu thê wì padài tam toq 'biaq hòm, trùh jò leq jah tôm đống mangai hadai broq bìac Chuaq ma 'bìq jêh tìah ca wì òiq.

### *Clep Baxìa Yàng Tadràu*

<sup>12</sup> Au ngan hnoq jò Haq đõih clep baxìa ma tadràu, èh taneh dalàc càn òiq jaq, mat mahì loh clam clòiq tìah ca bai briang gam xam xàc gam, mat khê gòh tìah ca mahem. <sup>13</sup> Mat halõng plình taclìh ta taneh, tìah ca plì long pòc jò òi nga taclìh jò cayeo hlôi ma dêh. <sup>14</sup> Plình jah 'nong lam tìah ca sech canua ôi rôm, khôi èh òiq đống wang wa pleo 'bìq hwenh hangai dèh ca nòi òi.

<sup>15</sup> Jò aih 'bài bùa crõng taneh, 'bài cwan càn, 'bài cwan lình, 'bài mangai padrõng can, 'bài mangai ma i cwìang thèq, 'bài mangai hapõng, wa wì ùh tawac ùh pakènh, òiq mùt mot hlèp ta còp hmu ta wang. <sup>16</sup> Wì haq doi ca wang, doi ca hmu: "Taclìh enh 'nhèq ca nhèn beq, cadoc nhèn beq òiq nhèn jah hlèp ca Haq ma ha'ngui ta gèq bùa, wa khôi ca can nòih da Trù Con, <sup>17</sup> ma jah 'màng aih hì nòih càn da Haq khôi trùh, cabô ma jah yòng?"

## 7

### *Mangai Yothaiq Jah i Teo Ta Ngòng*

<sup>1</sup> Atìq ca bìac aih, au hnoq pôn 'bình plình yòng òi pôn nòi mùm ta crõng taneh. Wì tàt đac cayeo pôn pah waq ca ùh i ca cayeo hlôi ta crõng taneh, ta diac raxìq, loq ta long leq. <sup>2</sup> Khôi èh au hnoq mòiq 'bình plình ma 'noi q tởc enh nòi mat mahì loh, haq wê teo kìq hiniq da Boc Plình ma rìh hloi hloi. Haq creo bàu dêh ca pôn ngai 'bình plình aih ma i cwìang itai broq raliang ca taneh wa diac raxìq. <sup>3</sup> Haq doi: "Apaq raliang crõng taneh, diac raxìq wa long, trùh jò leq nhèn khôi achìh teo kìq hiniq Boc Plình ta ngòng wì

hapǒng da Boc Plình bèn”. <sup>4</sup>Èh au tàng wì ma jah achìh teo kìq hiniq aih: 144.000 ngai loh enh rìm hadròng hadrech da Is-ra-ên:

<sup>5</sup> Enh hadròng hadrech Juda, 12.000.

Enh hadròng hadrech Rubên, 12.000.

Enh hadròng hadrech Gat, 12.000.

<sup>6</sup> Enh hadròng hadrech Ase, 12.000.

Enh hadròng hadrech Nep-ta-li, 12.000.

Enh hadròng hadrech Ma-na-se, 12.000.

<sup>7</sup> Enh hadròng hadrech Si-mê-ôn, 12.000.

Enh hadròng hadrech Lêwi, 12.000.

Enh hadròng hadrech I-sa-ca, 12.000.

<sup>8</sup> Enh hadròng hadrech Xa-bu-lun, 12.000.

Enh hadròng hadrech Jôsep, 12.000.

Enh hadròng hadrech Bê-n-ja-min, 12.000.

*Bàc Hrìn Mangai Caxùnh Blah Eo Yôh Taboc*

<sup>9</sup> Atìq ca aih au hnoq mangai pajùm bàc hrìn rèn ùh òi, loh enh rìm Diac, rìm nòi, rìm hiniq, rìm tamoi, rìm bàu capoch, wì yòng enh ngìa ca gèq bàu, enh ngìa ca Trìu Con caxùnh eo yôh taboc, tì wê hamenh hla rêq. <sup>10</sup> Wì creò dêh bàu doi:

“Bìac dèch claih aih loh enh Boc Plình  
ma ha'ngui ta gèq bàu  
wa loh enh Trìu Con.”

<sup>11</sup> 'Màng aih òiq òng 'bình plình ma yòng wawenh ca gèq bàu, wawenh ca craq broq gàu wa wawenh ca pôn ngè rìh, wì bla-op enh ngìa ca gèq bàu, hadrò cùp ta taneh, cùh waiq Boc Plình doi:

<sup>12</sup> “Amen!

Boc Plình da bèn tajì ca jah nhàn bàu calêu manè,  
can 'ngah 'ngai lem lình, khôn rabiaq,  
cwàng itai, can dêh,

trùh ti Haq hloi hloi ùh lùch,  
Amen.”

<sup>13</sup> Jò aih i mòiq ngai craq broq gàu bòch au: “Wì mangai ma caxùnh eo taboc, aih cabô wa wì trùh enh leq?”

<sup>14</sup> Au tèo hlài ca haq: “Ìh loq ro bìac aih.”

Haq doi ca au: “Wì aih mangai ma khoi loh enh bìac nan xa ma càn. Wì khoi rùh dèh eo cwàn broq taboc ta mahem Trìu Con. <sup>15</sup> Taiq 'màng aih

“wì haq jah yòng enh ngìa ca gèq bùa Boc Plình  
dahì damang patìh ca Haq ta hnem cùh waiq Haq,  
Haq ma ha'ngui ta gèq bùa  
jah òi ti wì.

<sup>16</sup> ‘Wì ùh pangot loq croh  
ranõng hòm,

hadai ùh i ca mat mahì  
wa hòì tòi bủ cheo wì haq.’☆

<sup>17</sup> Ma jah 'màng aih Trìu Con òi ta'ne gèq bùa  
jah wèq ban wì 'màng ca mangai wèq ban dèh trìu.

‘Haq 'ràng wì trùh ta diac tamõc ma rìh,’☆

‘hi khoi Boc Plình jah xùt diac mat wì diq dõng.’☆ ”

## 8

### *Clep Baxìa Yàng Tapèh*

<sup>1</sup> Jò Trìu Con dõih clep baxìa ma tapèh, i hatenh 'ne jò ùng hò ta plình.

<sup>2</sup> Au hnoq tapèh 'bình plình yòng enh ngìa ca Boc Plình wa i tapèh toq ken khoi am ca wì.

<sup>3</sup> I mòiq 'bình plình ma 'noi q trùh yòng pah ca 'bõng cùh waiq wê abôq xam wang. Haq khoi jah nhàn bàc jreo xua thùm, òiq haq mùt pajùm bàu waiq khàn da wì mangai hadròih òi ta ca 'bõng cùh waiq xam wang enh ngìa ca gèq

☆ 7:16 7:16 Êsai 49:10. ☆ 7:17 7:17 Êsai 49:10. ☆ 7:17 7:17 Êsai 25:8.



Bùa. <sup>4</sup> I nhòi jreo xua thùm pajùm ca bàu waiq khàn da wì mangai hadròih loh enh tì 'bình plình aih pan tọc enh ngĩa Boc Plình. <sup>5</sup> Khoi ca aih 'bình plình yóc cachah ùnh ta ca 'bống cùh waiq tah bình ta abôq, hi hwenh ta taneh, èh i plình cađah, atêh dêh, camlet 'lìch 'lìch, wa taneh dalàc.

<sup>6</sup> Wì tapèh 'bình plình wê tapèh toq ken padon hlôi.

#### *Ken Yàng Mòiq Hlôi*

<sup>7</sup> 'Bình plình ma baxèm hlôi, èh i mè preo wa ùnh alôn ca mahem, ùc loh ta crống taneh, bùh cađac mòiq phàn piq crống taneh, bùh cađac mòiq phàn piq long, bùh cađac đống nhat.

#### *Ken Yàng Baiq Hlôi*

<sup>8</sup> 'Bình plình ma baiq hlôi, èh au hnoq cacleq tìah ca mòiq toq wang càn 'bìq ùnh bùh, khoi cìh ta diac raxìq, <sup>9</sup> mòiq phàn piq diac raxìq wìa mahem, mòiq phàn piq ngè bìac ma rìh cachit wa mòiq phàn piq bong 'bìq raliang đac.

#### *Ken Yàng Piq Hlôi*

<sup>10</sup> 'Bình plình ma piq hlôi ken: I mòiq toq halống plình 'nang cheo tìah ca hadrêu taclìh enh plình, halống plình aih taclìh ta mòiq phàn piq 'bài cròng diac wa diac tamốc. <sup>11</sup> Hiniq halống aih: “Cachiq Xang”. Haq aih broq mòiq phàn piq diac wìa xang, èh i bàc ngai cachit taiq wì ôq diac wìa xang aih.

#### *Ken Yàng Pôn Hlôi*

<sup>12</sup> 'Bình plình ma pôn hlôi, broq raliang mòiq phàn piq mat mahì, mòiq phàn piq mat khê, mòiq phàn piq mat halống, waq ca mòiq phàn piq mat 'ngah aih loh ca clam clôiq, mòiq phàn piq dahì ùh xreo 'ngah, damang hadai mòiq phàn piq ùh xreo 'ngah.

<sup>13</sup> Èh au ngan hi tàng mòiq toq chìm cliang càn pan ta'ne plình creo bàu dêh doi: “Nan xa! Nan xa! Nan xa

am ca mangai jàn ma òi crõng taneh, ma jah 'màng aih xõq òi i atêh ken da piq 'bình plình padon hlôi èh.”

## 9

### *Ken Yàng Padam Hlôi*

<sup>1</sup> 'Bình plình ma padam hlôi, au hnoq mòi q toq mat halõng khoi clih enh plình trùh ta taneh, wa khoi jah am ca haq chia khwaq hàm jrùq ùh i ca nòi lùch. <sup>2</sup> Haq pèh hàm jrùq, i nhòì tõi enh hàm, tìah ca nhòì ùnh tanùh càn, nhòì aih broq clam ca mat mahì wa hòì. <sup>3</sup> Enh nhòì cô i 'bài líp tùc pan loh rai jàp ta crõng taneh, khoi jah am ca wì haq cwìang itai tìah ca agõt ta crõng taneh. <sup>4</sup> I bàù ùh thê wì aih raliang nhat òi crõng taneh loq hla long, loq ngè leq i nhum xenh, mahaq toq mangai leq ùh i ca teo kìq hiniq da Boc Plình ti ngòng wì haq. <sup>5</sup> Ùh thê wì jêh cachit mangai leq, mahaq toq broq ca wì chiuq jìq xa padam khê, òòiq wì haq jìq hiang bu dàng agõt cap. <sup>6</sup> Jò aih con mangai chaq trong cachit, mahaq chaq ùh hnoq, wì enh cachit mahaq can cachit lam hangai ca wì.

<sup>7</sup> 'Bài líp tùc aih tìah ca axêh padon lam tabroq, gàu wì còi cadoh bùa xam wang, hadrò wì haq tìah ca hadrò mangai. <sup>8</sup> Xàc gàu wì haq tìah ca xàc gàu gu cadri, wa hanenh wì haq tìah ca hanenh baco hlari. <sup>9</sup> Wì haq bac eo ta rada tìah ca eo broq xam mem, atêh panan wì haq pan tìah ca atêh xê axêh ma bàc, cadàu lam ta nòi tajêh. <sup>10</sup> Tenh wì haq i nõi cap ma loq jìq tìah ca tenh agõt, taiq tenh aih ma wì haq cap mangai i cwìang broq jìq padam khê. <sup>11</sup> Wì haq i bùa, aih can kiac ma òi ta hàm jrùq, bàù Hêbru doi: A-ba-đôn, bàù Hilap: A-pô-li-ôn.

<sup>12</sup> 'Mèq ranàc ma mòi q khoi dìq; ngan cô, i baiq toq 'mèq ranàc trùh hòm.

### *Ken Yàng Tadràu Hlôi*

<sup>13</sup> 'Bình plình ma tadràu hlôi ken, èh au tàng atêh loh enh pôn aki da ca'bông cùh waiq xam wang enh ngĩa Boc Plình. <sup>14</sup> I bàu aih doi ca 'bình plình ma tadràu 'nang wê ken: “Ca'naih pôn toq 'bình plình ngang dù ma khoi i cật òi ta cròng diac U-phra-tê beq!” <sup>15</sup> Pôn toq 'bình plình ngang dù cô khoi padon òi troq jò, hì, khê wa hanam jah lêh ca'naih òi wì jêh cađac mòiq phàn piq con mangai òi crông taneh. <sup>16</sup> Sôq cwung òi lình axêh aih: 200.000.000. Au tàng ro sôq wì haq aih.

<sup>17</sup> Ta can mahno, au hnoq axêh wa wì ma còi axêh aih 'màng cô: Wì haq bac eo xam mem nhum gòh tìah ca ùnh ma gòh, xenh tìah ca ngốc Saphia, ngèq tìah ca ngè ngèq 'nang ùnh bùh. Gàu axêh tìah ca gàu baco hlari, hacùng wì haq caprôh loh ùnh, nhòì, wa dahwèq ngèq 'nang ùnh bùh. <sup>18</sup> Mòiq phàn piq con mangai cachit taiq piq toq 'mèq ranac cô, aih ùnh nhòì wa dahwèq ngèq 'nang ùnh bùh loh enh hacùng axêh. <sup>19</sup> Ma jah 'màng aih cwiang itai da 'bài axêh aih òi nòi hacùng wa nòi tenh haq, taiq tenh wì haq tìah ca bìh òi i gàu òi jah cap broq jiq ca mangai.

<sup>20</sup> Wì mangai ma ùh hìaq cachit òi ta 'mèq ranac aih, xôq ùh wìh hlài cađac dèh manoh broq bìac ngang dù, aih bìac canòm dèh ca bìac tì wì haq ma broq loh, òi cùh waiq can kiac, waiq dua 'mù broq xam wang, xam 'bac, xam òi, xam long, 'mù ma ùh jah hnoq, ùh jah tàng, ùh jah cadiang lam. <sup>21</sup> Wì haq ùh cađac dèh manoh broq tòi jêh cađac mangai, tango anang, loq atùng.

## 10

### *Sech 'Yoh*

<sup>1</sup> Au hnoq 'bình plình ma 'noi ma dèh, loh enh plình caxùnh eo xam yùc, i hadong ti gàu haq, hadrò haq tìah ca mat mahì, jènh haq tìah ca jrang ùnh. <sup>2</sup> Tì haq wê sech 'yoh khoi pèh. Haq yòng jènh pah 'ma jòiq ta diac raxìq,

jènh pah 'ngeo jôiq ta crõng taneh. <sup>3</sup> Haq creò bàu dèh tìah ca baco hlari ca-ùm. Jò haq khoi creò, plình cađah tapèh yàng. <sup>4</sup> Jò plình cađah tapèh yàng, au padon achìh yõc bàu aih, mahaq au tàng bàu enh plình doi: “Phai wèq hlèp bìac tapèh yàng plình ma catô aih, apaq achìh yõc.”

<sup>5</sup> 'Bình plình au ma hnoq yòng òi ta diac raxìq wa ta crõng taneh, dèch tì pah 'ma ta plình, <sup>6</sup> pachac ngìa ca Haq ma rìh hloi hloi, Haq ma khoi broq plình wa rìm bìac òi ta plình crõng taneh wa rìm bìac òi crõng taneh, diac raxìq wa rìm bìac òi ta aih doi: Jò khoi ñìq, ùh gòm hòm, <sup>7</sup> mahaq trùh hì leq 'bình plình ma tapèh hlôi ken, Haq ma padon hlôi, èh hì aih bìac halac halùai da Boc Plình ma broq hlèp khoi broq gêh, tìah ca Haq ma khoi doi adroi dèh ca 'bài hapõng, aih mangai capoch thai Boc Plình.

<sup>8</sup> Bàu au ma khoi tàng enh plình, au tàng mòiq yàng hòm capoch tùang ca au, doi: “Lam beq, yõc sech 'yoh ma khoi pèh òi ta tì 'bình plình ma yòng òi ta diac raxìq wa ta crõng taneh.”

<sup>9</sup> Au lam trùh tì 'bình plình xìn haq am ca au sech aih. Haq doi ca au: “Yõc beq, hi caq, èh loh ca xang ta cliac ìh, mahaq ‘òì ta hacùng ìh, nhim tìah ca diac xùt.’<sup>☆</sup>” <sup>10</sup> Au yõc sech enh tì 'bình plình, hi khoi caq. Òi ta hacùng au, nhim tìah diac xùt, mahaq jò lǒn, èh xang òi ta cliac. <sup>11</sup> I bàu doi ca au: “Ìh phai capoch thai Boc Plình hòm ca bìac bàc tamoi, bàc Diac, bàc bàu capoch wa bàc bàu.”

## 11

### *Baiq Ngai Mangai Anoi Hlài*

<sup>1</sup> I mòiq ngai am ca au mòiq toq long tìah ca long wêh, hi khoi doi ca au: “Yòng beq, wêh hnem cùh waiq Boc Plình wa ca 'bõng cùh waiq, wa rèn 'bài mangai ma cùh waiq òi

☆ 10:9 10:9 Êxê 3:3.

ta aih. <sup>2</sup> Khoi èh xàn enh gùng ca hnem cùh waiq apaq wêh, ma jah 'màng aih xàn enh gùng khoi am ca wì jàn Diac 'noi; wì haq jah tràm jôiq phôq hadròih aih 42 khê. <sup>3</sup> Au am ca wa baiq ngai hapông 'yoh Au i cwìang itai. Wa lam anoi hlài bìac loq adroi 1.260 hì; wa haq caxùnh eo xam bai briang.” <sup>4</sup> Wa baiq ngai ma anoi hlài, aih baiq toq long ôliu wa baiq toq jènh ðen yòng enh ngìa ca Chuaq da crông taneh. <sup>5</sup> Tàng i mangai leq enh jêh wa, èh i ùnh enh hacùng wa haq capròh loh bùh ðac mangai git 'bôn aih; 'màng aih, mangai leq ma enh jêh wa haq, haq phai 'bìq jêh cachit 'màng aih. <sup>6</sup> Wa haq i cwìang clenh plình ðoìq ùh i ca mè jò wa anoi hlài bàu loq adroi. Wa haq i cwìang itai broq diac wìa mahem, broq bìac 'mèq ranàc òi crông taneh jò leq, hi mac ca wa haq enh broq toq leq yàng, xôq jah.

### *Baiq Ngai Mangai Anoi Hlài 'Bìq Jêh*

<sup>7</sup> Jò wa haq anoi hlài khoi gêh, i ngè yat tồc enh hàm jrùq, tabroq tajêh ca wa haq, èh jêh caðac wa. <sup>8</sup> Hanang wa haq òi ti trong da phôq Jê-ru-sa-lem, hadai jah creo phôq aih Sôðôm loq Aicàp (taiq wì jàn aih ngang dù). Phôq aih raq nòi Chuaq da wa haq khoi 'bìq tiang ðinh ta long pagat. <sup>9</sup> Wì mangai rìm nòi, rìm bàu capoch, rìm hadròng, wa rìm Diac jah hnoq hanang wa haq piq hì 'ne, ùh thê wì catùh hanang aih. <sup>10</sup> Wì mangai òi crông taneh bùi lem hnoq bìac cô, wì hi bùi ca dabau, gòi bìac am dech ca dabau taiq baiq toq ngai cô ma anoi bàu loq adroi, khoi broq ca wì mangai òi crông taneh chiùq xalep.

### *Baiq Ngai Mangai Anoi Hlài Rìh Hlài*

<sup>11</sup> Mahaq atiq ca piq hì 'ne aih, i hòì rìh enh Boc Plình mùt ta wa; wa haq padinh yòng. Wì ma ngan hnoq wa haq 'màng aih yùq crè ðìq ca jaq. <sup>12</sup> Wa haq tàng bàu ðêh enh

plình doi ca wa: “Tốc ta cô beq!” Wa tốc ta plình ỏi ta yùc; wì ma git ca wa òi hnoq wa.

<sup>13</sup> Adrình ca jò aih, taneh dalàc òi q jaq, mòiq phàn mòiq jàt phòq càn cô raliang, taclìh. 7.000 mangai cachit ca taneh dalàc aih. 'Bàì mangai ma ỏi rìh, òi q jaq wì yùc crè, hi khoi dèch can 'ngah 'ngai am ca Boc Plình ỏi ta plình.

<sup>14</sup> 'Mèq ranàc ma baiq khoi òi q; ngan cô, 'mèq ranàc ma piq renh trùh.

*Ken Yàng Tapèh Hlôi*

<sup>15</sup> 'Bình plình ma tapèh hlôi ken, i bàu ma dèh creò 'noh enh plình doi:

“Pàng cô taneh diac ma ỏi crõng taneh  
khai wìa Diac Chuaq bèn wa Diac da Crich Haq,  
Haq jah wèq cwàng hloi hloi!”

<sup>16</sup> Baiq jàt pôn ngai craq broq gàu ma ha'ngui ta gèq bùa enh ngia ca Boc Plình, òi q bla-op hadrò ta taneh cùh waiq Boc Plình, doi:

<sup>17</sup> “Ôi Chuaq Boc Plình ma I Cwàng Itai Òi q Dõng,  
ìh manàiq i, wa khoi i enh nèh,  
ma jah 'màng aih ìh i cwàng càn caiq òi q wèq cwàng  
càn dõng òi q rìm bìac.

<sup>18</sup> Wì rìm Diac loh nòih,  
mahaq can nòih da ìh khoi trùh,  
jò ìh hadrah mangai cachit khoi trùh,  
jò khoi trùh òi q 'noh bìac baha ca wì hapõng 'yoh  
ìh,  
aih mangai capoch thai Boc Plình,  
wa 'bài mangai hadròih,  
wa òi q ca mangai 'yoh wa mangai càn ma khoi loq iu hiniq  
ìh,  
hadai khoi trùh jò ìh jêh cađac wì mangai ma raliang  
cađac crõng taneh.”

<sup>19</sup> Jò aih hnem cùh waiq Boc Plình òi ta plình khoi pèh, hi khoi hom wêh jao da Chuaq jah hnoq òi ta hnem cùh waiq Haq, i camlet 'lìch 'lìch, i atêh dêh, i plình cađah, i taneh dalac, i mè preo ma càn loh enh plình.

## 12

### *Mangai Gu Cadri wa Bìh Ròng*

<sup>1</sup> I mòiq toq teo halac càn 'noh ta plình: I mòiq ngai gu cadri caxùnh mat mahì, enh 'neq ca jènh haq i mat khê, gàu haq côi cadoh bùa broq xam mat halõng plình 12 toq. <sup>2</sup> Haq hadròp con ta cliac; haq hmoi rawah taiq jìq ta cliac, ma jah 'màng aih khoi padon xa-ông. <sup>3</sup> Ta plình hadai mahno loh mòiq toq teo ma 'noi q hò m: Ngan cô, mòiq toq bìh ròng gòh càn mahno loh; bìh cô i tapèh toq gàu, 10 toq aki, gàu haq côi tapèh toq cadoh bùa. <sup>4</sup> Tenh haq dùng 'ràng mòiq phàn piq mat halõng plình ca'nìh ta crõng taneh. Bìh ròng càn aih yòng gòm enh ngìa ca gu cadri ma padon xa-ông waq ca haq jah lỏn con nga mangai cadri aih jò xa-ông. <sup>5</sup> Mangai cadri xa-ông mòiq toq con calô, con calô “ai h jah wèq cwìang rìm Diac, haq wê long dùì xam mem wèq wì;”<sup>☆</sup> con calô aih jah tỏc ta Boc Plình, trùh ta gèq bùa Haq. <sup>6</sup> Gu cadri cadàu mot ta nòi ùng hawit; ta aih Boc Plình khoi padon ca haq mòiq nòi ùng ban dađeh ta 1.260 hì.

### *Kiac Satan 'Bìq Cađac Enh Plình*

<sup>7</sup> Jò aih i bìac tabroq òi ta plình aih Mi-ca-ên wa 'bài 'bình lình haq tabroq tajêh ca bìh ròng, bìh ròng hadai i dèh 'bình lình haq wiang tabroq tajêh, <sup>8</sup> mahaq bìh ròng wa 'bình plình haq ùh 'blêq, 'màng aih wì haq pi i nòi ta plình hò m. <sup>9</sup> Bìh ròng aih bìh càn calah nèh, hiniq haq Macwì wa can kiac Satan, haq ma padô 'nùt ùng ùng con

<sup>☆</sup> 12:5 12:5 BCP 2:9.

mangai òi cởng taneh, khoi ca'nìh cađac haq wa 'bài 'bình  
plình haq ta cởng taneh.

<sup>10</sup> Au tàng bàu dêh òi ta plình doi:  
“Manàiq bìac dèch claih, cwìang itai,  
Diac Plình da Boc Plình bèn  
wa cwìang itai da Crich Haq khoi trùh,  
ma jah 'màng aih haq ma kian oh daq bèn  
enh ngia ca Boc Plình,  
manàiq khoi 'bìq hwenh ca'nìh cađac.

<sup>11</sup> Wì haq khoi ta'blêq ca haq  
nhò mahem Trìu Con,  
wa bàu wì anoi hlài;  
wì ùh loq 'ngwan ca can rìh dađeh 'nhac  
wì haq yùq crè 'bìq jêh cachit.

<sup>12</sup> Taiq 'màng aih, plình  
wa điq ca wì ma òi ta plình, phai bùi lem beq!  
Nan xa am ca diac raxìq wa cởng taneh,  
ma jah 'màng aih can kiac Satan khoi loh ca pì;  
haq loh nòih điq jaq  
taiq haq loq ca dađeh rìh pi dùnh dang leq hòm.”

<sup>13</sup> Jò bìh ròng hnoq dađeh 'bìq hwenh cađac ta cởng  
taneh, haq hnan ti rùp con cadrì ma khoi xa-ông con calô.

<sup>14</sup> Mahaq khoi jah am ca gu cadrì aih baiq toq panan chìm  
cliang càn waq ca haq jah cadàu claih ca bìh ròng, jah mùt  
ta nòi ðùng braih càn, jah wèq ban òi aiq khoi ca bìh ròng  
piq hanam 'ne. <sup>15</sup> Khoi èh, bìh càn caprôh 'noh diac enh  
hacùng haq broq diac cởng waq ca gu cadrì hìu ta diac.

<sup>16</sup> Mahaq taneh jùp ðò gu cadrì; taneh hah hacùng, hi ôq  
dõng diac ma bìh ròng ùc loh dêh enh hacùng. <sup>17</sup> 'Màng  
aih bìh ròng loh nòih ca gu cadrì, lam tabroq tajêh ca con  
caiq ma 'noi q da haq, aih 'bài mangai ma wèq bàu thê Boc  
Plình wa anoi hlài bìac Chuaq Jêxu Crich. <sup>18</sup> Bìh ròng yòng  
ta 'bò braih diac raxìq.



## 13

*Ngè Yat Ma Tõc Enh Diac Raxìq*

<sup>1</sup> Hi khoi au hnoq mòiq toq ngè yat tõi enh diac raxìq. Haq i 10 toq aki, i tapèh toq gàu, èh i 10 toq cadoh bùa côi ti aki haq. Õi ta gàu haq i achìh hiniq xam bàu 'mèq ðùng trùh Boc Plình. <sup>2</sup> Kiac au ma hnoq aih tìah ca 'beo, mahaq jèn h haq tìah ca jèn h higàu, hacùng haq tìah ca hacùng baco hlari, bìh ròn g am ca haq can dèh, gèq bùa, wa cwìang itai. <sup>3</sup> Tapèh toq gàu haq i mòiq toq ma loh habau tìah ca cachìt, mahaq habau aih khoi brèh. Wì òi ta crõng taneh ðìq ðõng hamàih ta manoh, lam tiaq haq. <sup>4</sup> Wì cùh waiq bìh ròn g taiq haq khoi am cwìang itai haq ca ngè yat; wì aih hadai cùh waiq ngè yat aih, doi: “Cabô ma nui ta'blêq ca haq? Cabô ma nui tabroq wa tajraq hlài ca haq?”

<sup>5</sup> Khoi jah am ca ngè yat i hacùng jah capoch padèch ðaðeh, capoch ha'nhèq ðùng trùh Boc Plình: Khoi am ca haq cwìang wèq piq hanam 'ne. <sup>6</sup> Èh haq hah cùng capoch lê Boc Plình, capoch ha'nhèq ðùng trùh hiniq Haq, hnem traiq cùh waiq Haq, wa 'bài mangai ma òi ta plình. <sup>7</sup> Khoi am ca haq cwìang jah tabroq tajêh ca 'bài mangai hadròih wa jah 'blêq. Haq hadai jah wèq cwìang ðìq ðõng ca mangai, rìm hadròn g, rìm bàu capoch, rìm Diac. <sup>8</sup> ðìq ðõng con mangai crõng taneh cùh waiq haq, aih ðìq ca mangai ma adroi ca plình crõng taneh 'nhòq broq loh, ùh i ca hiniq achìh mùt ta sech can rìh da Trìu Con ma khoi chiuq jêh ðac.

<sup>9</sup> Mangai leq i don, haq phai tamàng.

<sup>10</sup> “Mangai leq khoi pajaq 'bìq rùp,  
 èh phai 'bìq rùp,  
 mangai leq wê chang gùm jêh mangai,

èh mangai aih hadai cachit ca chang gùm.”<sup>☆</sup>  
 'Màng aih jò mangai hadròih 'bìq ti rùp, wì haq phai i  
 manoh lùì chiùq àt gòm Chuaq.

*Ngè Yat Ma Tõc Enh Taneh*

<sup>11</sup> Khoi ca aih, au hnoq enh taneh tõi mòiq toq ngè yat ma 'noiç. Haq i baiç toq aki tìah ca aki trìu con; haq capoch bàu tìah ca bàu bìh ròng. <sup>12</sup> Haq broq dõng ãiç cwìang itai enh ngè yat ma adroi enh ngìa ca haq aih. Haq thê crõng taneh wa ãiç ca mangai õi crõng taneh cùh waiç ngè yat ma baxèm, aih ngè yat ma i mòiq toq gàu loh habau loq broq cachit, mahaq khoi brêh. <sup>13</sup> Haq broq bàc trong halac càn, trùh 'mòi haq broq ùnh loh enh plình cìh crõng taneh enh ngìa ca mangai. <sup>14</sup> Haq padô 'nùt con mangai õi crõng taneh nhò broq bàc trong halac enh ngìa ca ngè yat, èh thê wì broq dua 'mù can kiac ma khoi loh habau xam chang gùm, mahaq õi rìh. <sup>15</sup> Khoi jah am ca haq cwìang itai broq dua 'mù cô jah hihèm, ji jah capoch, wa thê wì ma ùh cùh waiç dua 'mù haq 'bìq jêh cađac. <sup>16</sup> Haq thê wì rìm ngai 'yoh, càn, padrõng, pa, mangai ùh tawac ùh pakèn, hapõng, ãiç phai nhàn mòiq toq teo hadro jang tì pah 'ma, loq jang ngòng. <sup>17</sup> Mangai leq ùh i ca teo hadro aih, aih hiniç ngè yat loq sôq broq teo hiniç haq, ãiç ùh jah rõt, hadai ùh jah atech.

<sup>18</sup> Bìac cô nhet ca i khôn rabiaç. Mangai leq ma i manoh loq 'nì phai tình sôq da ngè yat; aih sôq da mòiq ngai; sôq aih 666.

## 14

*Trìu Con wa 144.000 Mangai*

<sup>1</sup> Khoi èh au hnoq Trìu Con yòng ta wang Siôn. Õi ti Haq i 144.000 ngai, ãiç i hiniç Trìu Con wa hiniç Baq Haq õi ti

<sup>☆</sup> 13:10 13:10 Jêr 15:2.

ngòng wì. <sup>2</sup> Au tàng bàu enh plình loh tìah ca atêh diac còi càn, wa tìah ca atêh plình cađah, aih atêh wì rawêh broc. <sup>3</sup> Wì calêu 'bõi calêu neo enh ngĩa ca gèq bùa, enh ngĩa ca wì pôn ngè rih, enh ngĩa ca wì craq broq gàu, ùh i ca mangai leq jah hõc 'bõi calêu cô enh gùng ca 144.000 ngai ma khoi jah rõt dèch loh khoi enh crõng taneh. <sup>4</sup> 'Bàì mangai aih hadròih, ùh lah tango anang ca gu cadri, (aih hiniq wì wèq dèh manoh, ùh cùh waiq cleq ma 'noi). Trìu Con lam ta leq wì haq tiaq ta aih. Wì haq khoi jah rõt dèch loh khoi enh crõng taneh òi q broq plì baxèm jò am ca Boc Plình wa Trìu Con. <sup>5</sup> Ùh i ca bàu amòng leq loh enh hacùng bàu wì haq, hadai ùh i ca teo xit leq ta wì haq.

<sup>6</sup> Khoi èh au hnoq mòi q ngai 'bình plình ma 'noi q pan ta 'ne plình wa crõng taneh, anoi hlài Bàu Lem ca wì mangai òi crõng taneh, rìm Diac, rìm hadròng, rìm bàu capoch wa rìm jàn. <sup>7</sup> Haq creò bàu dèh, doi: “Pì phai loq iu yùq Boc Plình wa am ca Haq can 'ngah 'ngai, ma jah 'màng aih khoi trùh jò Haq hadrah. Pì phai cùh waiq Haq ma broq loh plình crõng taneh, diac raxìq wa diq xèm diac.”

<sup>8</sup> I 'bình plình ma baiq tiaq atìq doi hòm: “'Ba-bi-lôn ma càn caiq tau khoi raliang taclìh dõng dìq,’<sup>✠</sup> ma jah 'màng aih phòq aih khoi am rìm Diac ôq alac tango anang manhài tràì da haq.”

<sup>9</sup> I 'bình plình ma piq tiaq atìq ca wa, doi bàu dèh: “Tàng i mangai leq cùh waiq ngè yat wa dua 'mù haq, nhàn teo hadro haq ti tì loq ti ngòng, <sup>10</sup> èh mangai aih hadai phai ôq alac can nòih ùh alôn da Boc Plình ma Haq khoi ùc ta doi chrõng can nòih da Haq, wa phai chiuq baxa ta ùnh wa dahwèq ngèq 'nang ùnh bùh òi enh ngĩa ca diq 'bình plình hadròih wa enh ngĩa ca Trìu Con. <sup>11</sup> Nhòì da bìac jìq xa da wì haq ma ep chiuq pan loh hloi hloi. Wì ma cùh waiq ngè

---

✠ 14:8 14:8 Êsai 21:9.

yat wa dua 'mù haq, xam 'bài mangai ma khoi i teo hadro achìh hiniq haq, èh enh dahì trùh damang ùh i jò leq jah padài.” <sup>12</sup> Cô bìac manoh chiùq àt da wì mangai hadròih. Wì haq wèq hloi bàu thê Boc Plình wa wèq dèh manoh lùì canòm Chuaq Jêxu.

<sup>13</sup> Khoi èh au tàng bàu doi enh plình: “Ìh phai achìh cô: Pàng cô ta èh, xôq ramốt jah am ca mangai cachìt, aih cachìt òi ta Chuaq!”

Yiang Hadròih doi: “Joq 'màng aih, òòiq wì jah padài enh bìac broq xalep, taiq bìac wì haq ma khoi broq tiaq wì haq.”

### *Jò Gat wa Jò Gich Plì Nho*

<sup>14</sup> Mòiq yàng hòm au ngan, au hnoq yùc taboc. Haq ma ha'ngui enh 'nhèq ca yùc tìah ca Con Mangai; gàu Haq côì cadoh bàu broq xam wang, tì Haq wê pla haiq hin. <sup>15</sup> I mòiq ngai 'bình plình ma 'noi q loh enh hnem cùh waiq, creo bàu dèh ca Haq ma ha'ngui ta yùc, doi: “Yòc pla haiq gat beq, ma jah 'màng aih jò gat khoi trùh, 'mau òi crống taneh khoi dùm.” <sup>16</sup> Haq ma ha'ngui ta yùc hwenh haiq ta crống taneh, hi khoi òi crống taneh jah gat.

<sup>17</sup> Khoi èh i mòiq ngai 'bình plình ma 'noi q loh enh hnem cùh waiq òi ta plình, hadai wê mòiq pla haiq hin. <sup>18</sup> I mòiq ngai 'bình plình ma 'noi q hòm loh enh ca'bông cùh waiq haq i cwiang wèq ùnh. Haq creo bàu dèh ca haq ma wê pla haiq hin: “Dèch pla haiq beq, gat ayùm plì nho crống taneh, ma jah 'màng aih plì nho khoi dùm.” <sup>19</sup> 'Bình plình aih hwenh pla haiq loh crống taneh gat plì nho, ca'nìh plì nho ta abôq panòih càn da Boc Plình. <sup>20</sup> Wì haq 'bìq jôiq ta maiq padit nho enh gùng ca phôq, hi khoi i mahem loh enh maiq padit, èh mahem aih ha'nhèq lạp trùh caxi khàp mong axêh, mahem aih hìu jah 320 kê sôq.

## 15

*Bìac Hnoq Ỗi Ta Diac Plình*

<sup>1</sup> Èh au hnoq mòiq teo halac càn ma 'noiç hòm ỗi ta plình, i tapèh 'bình plình wê tapèh toq bìac 'mèq ranàc ma atìq lùch, ma jah 'màng aih nhò tapèh toq 'mèq ranàc aih, càn nòih da Boc Plình khoi dìq. <sup>2</sup> Au hnoq diac raxìq tìah ca gùang xenh alôn ca ùnh. 'Bàì mangai ma khoi ta 'blêq ca ngè yat, dua 'mù haq wa sôq da hiniq haq, yòng ti 'bò diac raxìq tìah ca gùang, tì wì haq wê broc da Boc Plình. <sup>3</sup> Wì haq calêu 'bỗi calêu Môise, hapống Boc Plình, wa 'bỗi calêu Trìu Con, doi:

“Ỗi Boc Plình, Chuaq I Cwìang Itai Dìq Dống,

Bìac ìh ma broq dìq jaq càn wa halac!

Ỗi Bùa da rìm 'nhòng,

Trong da ìh ta-atoq wa joq 'nàng.

<sup>4</sup> Waiq Chuaq, mangai leq ma ùh loq iu  
wa dèch càn 'ngah 'ngai am ca ìh?

Ma jah 'màng aih toq ìh raq ma hadròih,

rìm Diac èh lam trùh cùh waiq enh ngìa ca ìh,

ma jah 'màng aih bìac broq ta-atoq

da ìh khoi jah pa'noh loh.”

<sup>5</sup> Khoi èh au hnoq traiq hnem cùh waiq khoi pèh ỗi ta Diac Plình, aih hnem traiq cùh waiq Boc Plình. <sup>6</sup> Tapèh 'bình plình loh enh Hnem Cùh Waiq aih, wê tapèh toq bìac 'mèq ranàc, wì caxùnh eo broq xam bai habùac hreo wa 'ngah; rada wì haq i caxi cật broq xam wang. <sup>7</sup> Mòiq ngè rìh ỗi ta pôn ngè rìh ma crài, am ca wì tapèh 'bình plình tapèh toq doi chrống ùc bình càn nòih Boc Plình ma rìh halình hloi hloi. <sup>8</sup> Dìq ca hnem cùh waiq i nhòì loh taiq càn 'ngah 'ngai lem lình wa cwìang itai da Boc Plình. ùh i ca mangai leq jah mùt ta hnem cùh waiq adroi ca tapèh bìac 'mèq ranàc da tapèh 'bình plình 'nhòq broq gêh.

## 16

*Tapèh Doi Chrõng Ûc 'Noh Ta Crõng Taneh*

<sup>1</sup> Khoi èh au tàng bàu dèh enh hnem cùh waiq doi ca wì tapèh 'bình plình: “Lam beq, ùc 'noh tapèh toq doi chrõng can nòih da Boc Plình loh crõng taneh.”

*Doi Chrõng Yàng Mòiq*

<sup>2</sup> 'Màng cô 'bình plình baxèm lam ùc doi chrõng haq ta crõng taneh. Wì mangai ma i teo hadro da ngè yat wa waiq dua 'mù haq, loh patenh pa-êh jìq wa om.

*Doi Chrõng Yàng Baiq*

<sup>3</sup> 'Bình plình ma baiq ùc 'noh doi chrõng haq ta diac raxìq, èh diac raxìq wìa mahem tìah ca mahem mangai cachit; 'bài ngè ma rìh òi ta diac raxìq cachit dõng dìq.

*Doi Chrõng Yàng Piq*

<sup>4</sup> 'Bình plình ma piq ùc 'noh doi chrõng haq ta crõng diac wa ta diac tamõc, èh diac wìa dõng mahem. <sup>5</sup> Au tàng 'bình plình ma wèq diac, doi:

“Ô Chuaq ma ta-atoq, manàiq 'nang i, ma khoi i enh nèh.  
 ìh hadròih, ma jah 'màng aih ìh khoi hadrah bìac cô,  
<sup>6</sup> taiq wì haq khoi broq ta-ùc mahem 'bài mangai hadròih,  
 wa 'bài mangai capoch thai Boc Plình,  
 ma jah ìh am wì haq ôq mahem 'màng aih joq troq.”

<sup>7</sup> Au tàng bàu enh ca'bõng cùh waiq doi:

“Jòq, Boc Plình Chuaq I Cwìang Itai Dìq Dõng,  
 bìac hadrah da ìh, joq ta-atoq wa joq 'nàng.”

*Doi Chrõng Yàng Pôn*

<sup>8</sup> 'Bình plình ma pôn ùc 'noh doi chrõng haq ta mat mahì; mat mahì jah i cwìang bùh con mangai. <sup>9</sup> Mat mahì xreo tôq dìq jaq bùh con mangai, taiq 'màng aih wì ma capoch bàu ha'nhèq dùng trùh Boc Plình ma i cwìang itai

ta bìac 'mèq ranàc cô, mahaq wì haq ùh cađac dèh manoh broq tôiq wa anoi am ca Chuaq bìac 'ngah 'ngai.

*Doi Chrõng Yàng Padam*

<sup>10</sup> 'Bình plình ma padam ùc 'noh doi chrõng haq òi ta gèq bùa ngè yat; Taneh Diac haq loh ca clam clôiq; con mangai cap dèh rapet taiq wì jìq hrìn. <sup>11</sup> Wì capoch ha'n'hèq ãùng trùh Boc Plình òi ta Diac Plình taiq loh patenh pa-êh jìq hrìn, mahaq èh wì xôq ùh chiùq cađac dèh manoh broq tôiq lôl wa biac ngang dù wì broq.

*Doi Chrõng Yàng Tadràu*

<sup>12</sup> 'Bình plình ma tadràu ùc loh doi chrõng haq ta diac cròng càn U-phra-tê, broq ca cròng diac cô loh ca croh, padon trong ca 'bài bùa enh mat mahì loh i trong lam. <sup>13</sup> Jò aih au hnoq i piq toq can kiac ùh hruah tìah ca kít ua, loh enh hacùng bìh ròng, enh hacùng ngè yat, wa enh hacùng mangai amòng capoch bàu loq adroi, <sup>14</sup> taiq wì aih 'bài can kiac da can kiac Satan broq teo halac. Wì haq lam trùh ta 'bài bùa jàp crõng taneh ãòiq tagop 'bài bùa aih waq ca wiang tajêh, trùh hì ma càn da Boc Plình ma i cwiang itai ãìq ãõng.

<sup>15</sup> “Ngan cô! Au lam trùh tìah ca mangai atùng. Xôq ramõt ca mangai leq ma rìu hmàng wèq dèh eo yôh, ãòiq ùh hìaq lam rahòng, èh wì ùh hìaq am wì hnoq bìac camaih ãàđeh.”

<sup>16</sup> Wì tagop 'bài bùa òi mòi q nòi, nòi aih bàu Hêbru doi: Ha-mê-ghe-đôn.

*Doi Chrõng Yàng Tapèh*

<sup>17</sup> 'Bình plình ma tapèh ùc 'noh doi chrõng haq ta hòl cayeo, èh i bàu ãèh ãìq jaq capoch 'noh enh hnem cùh waiq, enh gèq bùa, doi: “Khoi gêh!” <sup>18</sup> Tajòl 'mòi i camlet

'lìch 'lìch, i plình hilùng, plình cadàh, taneh dalàc dèh enh baxèm broq loh con mangai ta crống taneh trùh manàiq, 'nhòq lah i 'màng aih. <sup>19</sup> Phòq càn tapah broq loh piq phàn, wa òiq ca phòq càn da tamoi Diac 'noi q ma òi ta crống taneh hadai raliang taclìh òng òiq. Boc Plình hmàng hlài ca phòq càn Ba-bi-lôn, wa am ca haq ôq alac can nòih ramòt da Boc Plình. <sup>20</sup> Rìm pleo òiq cadàu mot, wa 'bài wang pi hnoq hòm. <sup>21</sup> I cato mè preo càn, trap loi 50 kìq, cìh enh plình loh ta con mangai òi crống taneh. Con mangai capoch 'mèq ha'nhèq òng trùh Boc Plình taiq bìac 'mèq ranàc mè preo cô, aih bìac ramòt òiq jaq.

## 17

### *Hadrah Baxa Phòq Ba-bi-lôn*

<sup>1</sup> Òi ta wì tapèh 'bình plình ma wê tapèh toq doi chrống, i mòiq 'bình plình trùh haten ca au, doi: “Lam ta cô beq, au jah am ca ìh hnoq bìac hadrah baxa trùh ca gu cadrì tango ma wèq cwàng bàc crống diac. <sup>2</sup> 'Bài bùa ta crống taneh khi broq tôiq tango anang ca haq, wa mangai jàn òi crống taneh hadai bù ca alac tango anang da haq.”

<sup>3</sup> Nhò Yiang Hadròih, 'bình plình 'ràng au trùh nò òng òng hawit. Au hnoq mòiq ngai gu cadrì ha'ngui enh crống mòiq toq ngè yat chac haq gòh mahem, òiq ca chac haq achìh bìac capoch bàu ha'nhèq òng trùh Boc Plình, haq i tapèh toq gàu wa 10 toq aki. <sup>4</sup> Gu cadrì aih caxùnh eo gòh ngùi wa gòh mahem, haq anì xam wang, hmu ngòc canaq 'bac, wa pliang ngòc; ta tì haq mòiq apah wê doi chrống xam wang tah bình bìac 'mèq 'mac wa bìac tango anang haq. <sup>5</sup> Òi ti ngòng haq i achìh hiniq:

“Bìac halac halùai,  
Ba-bi-lôn càn caiq,  
Miq da 'bài mangai tango anang  
wa bìac 'mèq 'mac da crống taneh.”



<sup>6</sup> Au hnoq mangai cadrì aih bù ca mahem 'bài mangai hadròih wa mahem 'bài mangai ma anoi hlài bìac Chuaq Jêxu.

Jò au hnoq, au òiq jaq hamàih. <sup>7</sup> 'Bình plình bòch au: “Hagleq ìh ma hamàih? Au jah anoi ca ìh ro rang bìac halac halùai da gu cadrì 'mat, wa ngè yat ma pòq haq, ngè yat ma i tapèh toq gàu wa 10 toq aki. <sup>8</sup> Ngè yat ìh ma hnoq haq ma mahno loh adroi cô nèh, manàiq pi i, haq tǒc enh hám jrùq ùh i ca nòi lùch wa lam trùh nòi 'bìq raliang cađac. 'Bài mangai òi crǒng taneh ma ùh i hiniq achìh 'mùt òi ta Sech Can Rìh enh jò broq plình crǒng taneh, wì òiq jaq hamàih jò wì hnoq ngè yat aih, haq khoi i adroi cô nèh, manàiq pi hnoq hòmh, mahaq èh mahno loh hòmh.

<sup>9</sup> “Bìac cô mangai ma i khôn rabiaq men loq 'nì. Tapèh toq gàu aih tapèh toq wang, nòi gu cadrì aih ha'ngui, <sup>10</sup> aih hadai tapèh toq bùa. Padam bùa khoi ta-ùc đac, mòiq bùa 'nang wèq cwàng wa haq ma 'noi q 'nhòq trùh. Jò haq aih hi trùh èh, haq aih hadai ùh òi dùnh. <sup>11</sup> Khoi èh ngè yat adroi nèh ma khoi i mahaq pi i, haq broq bùa ma rahem, haq hadai pajùm ca wì tapèh toq bùa, haq 'bìq raliang cađac.

<sup>12</sup> “ 'Màng aih 10 toq aki ìh ma hnoq, aih 10 toq bùa, 'nhòq nhàn yǒc dèh cwàng broq bùa, mahaq èh wì jah wèq cwàng pajùm ca ngè yat ta mòiq jò raq. <sup>13</sup> Wì haq pajùm mòiq manoh am ca ngè yat cwàng itai da wì, <sup>14</sup> Wì haq tajèh tabroq ca Trìu Con. Trìu Con 'blêq wì haq, ma jah 'màng aih Haq broq Chuaq enh 'nhèq ca 'bài chuaq, Bùa enh 'nhèq òiq ca bùa, wa 'bài mangai ma òi ti Haq, aih 'bài mangai ma khoi jah creò, aih 'bài mangai ma khoi jah ràih, 'bài mangai wèq dèh manoh òiq òi ti Trìu Con.”

<sup>15</sup> Khoi èh 'bình plình doi ca au: “ 'Bài cròng diac ìh ma hnoq nòi ma i gu cadrì tango anang ma ha'ngui, aih bàc jàn, bàc mangai, bàc Taneh Diac wa bàc bàu capoch. <sup>16</sup> Ngè

yat wa 10 toq aki ìh ma khoi hnoq, wì haq tagit ca gu cadrì tango. Wì raliang haq broq ca haq ỏi rahòng, caq jam haq wa bủh đac haq ta ùnh, <sup>17</sup> ma jah 'màng aih Boc Pình khoi đòiq ca wì haq broq tiaq manoh enh da Haq, broq ca wì haq pajùm mòi q manoh, am cwìang itai da wì haq ca ngè yat, trùh jò bàu Boc Pình jah xit jua. <sup>18</sup> Mangai cadrì ìh ma hnoq, aih phòq càn wèq cwìang enh 'nhèq ca bùa ỏi jàp cởng taneh.”

## 18

### *Ba-bi-lôn 'Bìq Raliang Cadac*

<sup>1</sup> Atìq ca aih au hnoq mòi q 'bình pình ma 'noi q loh enh pình, haq i cwìang càn ha'nhèq, bìac 'ngah 'ngai lem lình da haq xreo 'ngah cởng taneh. <sup>2</sup> Haq creò bàu dêh, doi:

“Ba-bi-lôn ma càn khoi taclìh, khoi taclìh! ☆  
Phòq aih khoi wìa nòi ỏi da bàc can kiac,  
nòi trom clêh đòiq đìq ca 'bài can kiac dù,  
cadriang clêh đòiq bàc 'bài adrech chìm  
'mèq 'mac amùà amech wa đàng tagit.

<sup>3</sup> Ma jah 'màng aih rìm Diac,  
rìm jàn khoi ôq alac tango anang manhài trài da haq.  
'Bài bùa ỏi cởng taneh khoi tango ỏi ti haq,  
'bài mangai padro ta cởng taneh broq padrởng can  
nhò bìac loq racaih dahwèq canaq da haq.”

<sup>4</sup> Au hadai tàng bàu ma 'noi q enh pình, doi:  
“Ôi jàn da Au, loh khoi enh Ba-bi-lôn beq,’ ☆  
đòiq pì ùh alùh pajùm tôiq lôi ti haq,  
èh ùh hìaq chiuq 'mèq ranàc pajùm ca haq,  
<sup>5</sup> ma jah 'màng aih tôiq lôi haq ha'nhèq chàu pình,  
wa Boc Pình khoi hmàng trùh bìac ngang dù da haq  
ma khoi broq.

☆ 18:2 18:2 Êsai 21:9. ☆ 18:4 18:4 Jêr 51:45.

<sup>6</sup> Ca'naih hlài da haq bìac dù haq ma khoi broq ca wì.  
 Phai ca'naih hlài baiq phàn bìac haq ma khoi broq ca  
 mangai 'noiq,  
 haq am ca wì mòiq doi chrõng alac,  
 pì phai am ca haq baiq doi.

<sup>7</sup> Haq khoi jah broq 'ngah 'ngai ca dađeh wa loq racaih  
 dàng leq,  
 èh phai broq ca haq jìq xa wa crò hmoi dàng aih,  
 ma jah 'màng aih haq hèm ta manoh:  
 'Au wèq cwìang tìah ca bùa cadrì ha'ngui dèh enh  
 'nhèq ca gèq bùa.

Au ùh xài gu cadrì hadrô  
 wa au ùh ep hnoq bìac crò hmoi.'

<sup>8</sup> 'Màng aih bìac 'mèq ranàc jah trùh ti haq trom mòiq hì:  
 Bìac cachit, bìac crò hmoi, wa bìac pangot hrah.  
 Haq jah 'bìq ùnh bùh, ma jah 'màng aih Boc Plình,  
 Haq ma i cwìang itai đõng ãiq jah baxa haq 'màng  
 aih.

<sup>9</sup> “'Bài bùa òi crõng taneh ma khoi broq tôiq tango  
 anang ti haq, wa broq manhài trài ti haq, èh wì crò hmoi  
 dài haq, jò hnoq nhòi enh ùnh ma bùh haq pan tõi. <sup>10</sup> Wì  
 yòng òi enh hangai, yùq loq ep chiùq bìac nan xa ti haq.  
 Wì doi:

“'Nan xa! Nan xa ca ìh Ba-bi-lôn,  
 phôq càn, phôq can dèh!

Trom mòiq jò, bìac hadrah baxa ìh khoi trùh!’

<sup>11</sup> “'Bài mangai ma padro òi crõng taneh hadai taiq haq  
 ma jah mango crò hmoi, ma jah 'màng aih pi i ca mangai  
 leq rõt tech hòm. <sup>12</sup> Dahwèq aih: wang, 'bac, hmu canaq,  
 pliang ngõc, bai habùac lem, bai gòh drinh, bai luaq, ngè  
 gòh mahem, long gô xua thùm, bìac wì ma broq xam bla  
 rõi, long canaq, xam ãùng, xam mem, xam hmu hliang,  
<sup>13</sup> cwèq, jreo xua thùm, tràm, dầu xua thùm, nhù hùang,

alac, dàu ôliu, dác mì, phi mì, 'bo wa trìu, axêh wa xê axêh, hapõng dích, wa mahua yiang con mangai.

<sup>14</sup> “Plì mahua yiang ìh ma ham enh aih khoi hù hnhung!  
Bìac 'ngah 'ngai padrõng can aih hadai khoi hù hnhung,  
hi khoi, ìh pi i jò leq chaq hnoq hò. <sup>15</sup> 'Bàì mangai padro  
wìa padrõng can nhò tech rớt ti haq, hadai yùq crè taiq  
bìac jìq xa da haq, èh yòng enh hangai. <sup>16</sup> Wì crò hmoi rai  
doi:

“‘Nan xa! Nan xa ca phôq càn tau,  
ìh khoi lah caxùnh eo bai habùac lem lình,  
bai gòh drinh wa gòh mahem, anì wang, ngốc wa  
hmu canaq;

<sup>17</sup> trom mòiq jò ðùng hô, bìac càn caiq, bìac can padrõng  
khai hnhung cađac!’

“Wì mangai craq bong, rìm mangai lam ta bong, mangai  
broq bìac ta bong, wa wì ma abroq xam bìac ta diac raxìq,  
yòng ði hangai, <sup>18</sup> jò wì ngan nhòì tọc enh ùnh ma bùh  
cađac phôq, wì haq creo bàu dêh, doi: ‘I ca phôq leq ma  
càn troi phôq cô?’ <sup>19</sup> Wì rai blo ta gàu, doi rai crò hmoi:

“‘Nan xa! Nan xa ca phôq  
càn cô khai yốc bìac can padrõng dađeh  
broq rìm ngai i bong ta diac raxìq wìa padrõng can,  
taiq trom mòiq jò ðùng hô,  
khai raliang, broq nòi aih tìah ca nòi hawit!’

<sup>20</sup> “Ôi Diac Plình bùi lem beq!

'Bàì mangai hadròih,  
'bài sùq ðô wa 'bài mangai capoch thai Boc Plình,  
lem bùi beq, ma jah 'màng aih Boc Plình khai hadrah baxa  
haq tìah ca haq ma khai baxa pì.”

<sup>21</sup> Khai èh i mòiq 'bình plình ma càn dèch apao broq  
xam hmu, hwenh ta diac raxìq, rai doi:

“ 'Màng cô phòq Ba-bi-lôn ma càn hadai 'bìq hwenh ta  
 diac raxìq,  
 dìq jaq ramòt 'màng cô;  
 pàng cô ta èh, pi hnoq haq hòm.

<sup>22</sup> Pi i tàng atêh broc,  
 chình cala, ken òi ta aih hòm.  
 Hadai pi hnoq mangai thòq  
 bong leq hòm,  
 'nhac ca thòq broq cleq hadai,  
 atêh xai hmu ji pi tàng hòm.

<sup>23</sup> Nòi cô pi i 'ngah đên xreo,  
 hadai pi i tàng bàu wì ta'nèp ỡng mai,  
 ma jah 'màng aih 'bài mangai ma padro òi ti ìh,  
 wì mangai gu craq i cwìang òi cởng taneh,  
 taiq rìm jàn ta rìm Diac khoi 'bìq padô 'nùt nhò  
 bìac pajàu da pì tadreo ca can kiac.

<sup>24</sup> Taiq òi ta haq khoi chaq hnoq mahem da mangai capoch  
 thai Boc Plình,  
 mangai hadròih, wa dìq ca mangai ma khoi 'bìq jêh  
 cachìt ta cởng taneh.”

## 19

### *Calêu Manè Jò Ba-bi-lôn Raliang*

<sup>1</sup> Atìq ca bìac cô, au tàng bàu dêh da mangai bàc pajùm  
 òi ta plình, doi:

“Ha-lê-lu-ya!

Bìac dèch claih, bìac 'ngah 'ngai lem lình wa cwìang itai  
 dìq òi ta Boc Plình da bèn.

<sup>2</sup> Bìac hadrah da Haq dìq jaq ta-atoq wa joq 'nàng.  
 Haq khoi hadrah gu cadrì tango anang càn caiq  
 khoi lah broq amùa ca cởng taneh xam bìac tango  
 da haq.

Boc Plình baxa chau haq taiq haq khoi broq ta-ùc mahem  
 'bài hapǒng Boc Plình!”

<sup>3</sup> Wì haq doi yàng ma baiq hòm:

“Ha-lê-lu-ya!

Nhòi loh enh ùnh ma bùh haq pan tǒc hloi hloi.”

<sup>4</sup> Baiq jàt pôn ngai craq broq gàu wa wì pôn ngè rìh  
 hacùn cràng cùh waiq Boc Plình đàng ha'ngui ta gèq bùa.  
 Wì doi:

“Amen. Ha-lê-lu-ya!”

<sup>5</sup> I bàu enh gèq bùa doi:

“Phai manè apôi Boc Plình beq,

dìq ca pì hapǒng Haq

ma loq iu loq crè ca Haq,

'nhac ca 'yoh loq càn.”

<sup>6</sup> Au tàng i bàu mangai bàc tìah ca atêh diac còi càn, tìah  
 ca plình catô ma dêh, doi:

“Ha-lê-lu-ya!

Ma jah 'màng aih Chuaq, Boc Plình bèn,

Haq ma i cwàng itai dìq dǒng, 'nang wèq cwàng.

<sup>7</sup> Bèn phai bùi lem, bùi lem dìq jaq hi broq 'ngah 'ngai Haq,

ma jah 'màng aih hì ta'nèp da Trìu Con khoi trùh,

mai Haq khoi padon dađeh.”

<sup>8</sup> Khoi am haq caxùnh eo lem linh hreo xam bai habùac  
 lem,

ma jah 'màng aih bai habùac cô bìac ma lem ta-atoq da

'bài mangai hadròih.

<sup>9</sup> 'Bình plình doi ca au: “Achìh beq: Am xôq ramǒt ca  
 wì ma khoi akhen trùh caq hiniang lè ta'nèp da Trìu Con”,  
 hi khoi haq doi tam ca au: “Bàu cô bàu joq 'nàng da Boc  
 Plình.”

<sup>10</sup> Au bla-op enh ngìa 'bình plình jang jènh haq cùh  
 waiq haq, mahaq haq doi ca au: “Apaq broq 'màng cô; au

hadai broq hapǒng troi ìh. Au cô bua ìh wa 'bài oh daq ìh ma wèq bàu anoi hlài da Chuaq Jêxu. Phai cùh waiq Boc Plình, ma jah 'màng aih bìac anoi hlài bàu Chuaq Jêxu, aih raq bàu da mangai capoch thai Boc Plình.”

<sup>11</sup> Èh au hnoq plình tapèh, hi khoi au hnoq i mòiq toq axêh taboc. Haq ma còi axêh aih, hiniq Haq: Wèq Dèh Manoh wa Bàu Joq 'Nàng. Haq yǒc bìac ta-atoq òđi q hadrah wa tabroq tajêh. <sup>12</sup> Mat Haq tiah ca pla ùnh, gàu Haq còi bàc cadoh bùa, wa i achìh mòiq hiniq ta Haq, enh gùng ca Haq ùh i ca mangai leq ma loq. <sup>13</sup> Haq caxùnh eo khoi lùac ta mahem, hiniq Haq jah padèch doi: “Bàu Boc Plình.” <sup>14</sup> 'Bài cwung òđi q ǒi ta plình òđi q caxùnh bai habùac lem, taboc wa hreo, còi axêh taboc tiaq Haq. <sup>15</sup> Enh hacùng Haq loh mòiq pla chang gùm hin, Haq yǒc òđi q jêh baxa rìm jàn, èh “Haq jah yǒc long òđi q xam mem wèq cwàng wì;”<sup>☆</sup> Haq jah jòiq padit plì nho ta hòm, aih plì nho da can nòih ramòt da Boc Plình ma i cwàng itai òđi q òđing.

<sup>16</sup> Ta eo cwàn Haq wa ta cataih Haq khoi achìh hiniq:

Bùa enh 'nhèq òđi q ca bùa wa Chuaq enh 'nhèq òđi q ca chuaq.

<sup>17</sup> Èh au hnoq mòiq 'bình plình yòng ta mat mahì, haq dèh bàu creò òđi q ca chìm ma pan ta'ne plình wa crǒng taneh, doi: “Trùh ta cô beq, tagop hlài òđi q caq hiniang can da Boc Plình, <sup>18</sup> òđi q pì caq jam 'bài bùa, 'bài cwan, jam wì i cwàng, jam axêh wa 'bài mangai ma còi axêh, jam 'bài mangai ùh tawac pakènh, wa hapǒng òđi q, mangai 'yoh wa can.”

<sup>19</sup> Au hnoq ngè yat wa 'bài bùa crǒng taneh wa cwung òđi q da wì haq, tagop pajùm padon tabroq tajêh ca Haq ma còi axêh wa cwung òđi q da Haq. <sup>20</sup> Mahaq ngè yat aih 'bìq rùp pajùm ti mangai amòng capoch bàu loq adroi ma khoi lah broq bàc bìac halac enh ngìa ca haq, òđi q padò 'nùt

<sup>☆</sup> 19:15 19:15 BCP 2:9.

'bài mangai khoi i teo hadro da ngè yat wa cùh waiq dua 'mù haq, hi khoi wa baiq aih ma òi rìh, òi q 'bìq hwenh cìh ta 'bau ùnh ðang cheo ðêh xam dahwèq ngèq ùnh 'nang bùh. <sup>21</sup> 'Bài mangai ma òi rìh òi q cachìt ca chang gùm loh enh hacùng Haq ma còi axêh, èh òi q ca chìm caq panàc jam wì haq.

## 20

### *'Nhòng Mòiq Ngõng Hanam*

<sup>1</sup> Hi khoi, au hnoq 'bình plình loh enh plình, tì haq wê mòiq toq chia khwaq hàm jrùq wa mòiq hadrang caxi mem tagwat càn. <sup>2</sup> Haq rùp cật bìh ròng, aih bìh calah nèh, aih can kiac Satan, hi cật ðòiq haq mòiq ngõng hanam. <sup>3</sup> 'Bình plình aih hwenh ca'nìh haq ta hàm jrùq, khwaq wa clep baxìa, waq ca haq pi jah lam padô 'nùt mangai jàn ta rìm Diac hòm, trùh jò leq mòiq ngõng hanam khoi gêh, haq men jah ca'naih loh toq 'biaq jò hòm.

<sup>4</sup> Au hnoq 'bài gèq bùa, i mangai ha'ngui ta aih khoi jah am cwàng hadrah. Khoi ca aih, au hnoq mahua yiang 'bài mangai chiuq pốt gàu taiq anoi hlài bìac Chuaq Jêxu wa bàu Boc Plình, wì ma ùh cùh waiq ngè yat wa dua 'mù haq, hadai ùh yóc ca teo hadro haq jang ngòng, loq jang tì. Wì haq aih jah rìh wa wèq cwàng ti Chuaq Jêxu Crich mòiq ngõng hanam. <sup>5</sup> Mahaq wì mangai ma khoi cachìt ma 'noi q ùh jah rìh hlài trùh jò leq khoi òi q mòiq ngõng hanam, aih bìac rìh hlài yàng baxèm. <sup>6</sup> 'Bài mangai ma jah i phàn ta bìac rìh hlài yàng baxèm khoi i xôq ramôt wa can hadròih. Can cachìt yàng baiq ùh i ca cwàng cleq enh 'nhèq ca wì aih, mahaq wì jah broq pajàu Boc Plình wa Chuaq Jêxu Crich, èh hadai jah wèq cwàng ti Haq mòiq ngõng hanam.

<sup>7</sup> Jò mòiq ngõng hanam khoi gêh, can kiac Satan jah ca'naih loh enh tù, <sup>8</sup> èh haq jah ca'naih loh khoi enh hàm



jrùq òòiq lam padô 'nùt rìm jàn ma rìh òi crõng taneh, aih Got wa Magot, haq tagop wì òòiq tabroq tajêh; wì bàc tiah ca braih ta diac raxìq. <sup>9</sup> Wì haq lam jàp crõng taneh, dudan ca traiq wì mangai hadròih, wa ca phòq Boc Plình ma loq waq, mahaq i ùnh loh enh plình bùh dõng wì haq. <sup>10</sup> Khoi èh can kiac Satan ma padô 'nùt wì haq, khoi 'bìq hwenh cađac haq nòi 'bau ùnh wa ngè ngèq 'nang ùnh bùh, ta aih khoi i ngè yat wa mangai amòng capoch bàu loq adroi 'bìq hwenh ca'nìh adroi. Wì haq chiùq jìq xa enh dahì trùh damang trùh hloi hloi.

*Bìac Hadrah Yàng Ma Atìq Lùch*

<sup>11</sup> Èh au hnoq mòiq toq gèq bùa càn taboc, i mòiq Ngai ha'ngui ta aih. Enh ngìa ca Haq plình crõng taneh mot dõng òiq, pi i nòi leq òòiq ca wì haq hòm. <sup>12</sup> Au hadai hnoq 'bài mangai cachìt, mangai 'yoh wa càn yòng enh ngìa ca gèq bùa, èh 'bài sech khoi pèh dõng òiq; hadai i pèh mòiq sech ma 'noi q hòm, aih Sech Can Rìh, hi khoi tiaq bìac khoi achìh ta sech aih, mangai cachìt 'bìq hadrah baxa tiaq bìac broq da wì haq. <sup>13</sup> Diac raxìq am hlài wì mangai ma cachìt òi ta aih. Can Cachìt wa Nòi Mangai Cachìt hadai am hlài 'bài mangai ma cachìt. Rìm ngai chiùq hadrah hi mac ca bìac wì haq khoi broq. <sup>14</sup> Khoi èh can cachìt wa nòi mangai cachìt 'bìq hwenh cađac loh ta 'bau ùnh. 'Bau ùnh, aih can cachìt yàng ma baiq. <sup>15</sup> Mangai leq ùh i hiniq dađeh khoi achìh mùt ta Sech Can Rìh, òiq 'bìq hwenh 'noh ta 'bau ùnh.

## 21

*Plình Neo Wa Crõng Taneh Ma Neo*

<sup>1</sup> Khoi èh au hnoq “plình neo wa taneh neo,”<sup>☆</sup> ma jah 'màng aih plình baxèm wa crõng taneh baxèm khoi

☆ 21:1 21:1 Êsai 65:17.

hnhung, diac raxìq hadai pi i hòm. <sup>2</sup> Au hadai hnoq phòq hadròih, aih phòq Jê-ru-sa-lem neo enh Boc Plình loh enh plình, khi padon òòiq tìah ca mangai mai adrùh anì caxùnh eo lem gòm ta'nèp dèh ca òng. <sup>3</sup> Au tàng bàu dèh enh gèq bùa doi: “Ngan cô, hnem traiq cùh waiq da Boc Plình òi ti con mangai. Haq jah rìh òi ti wì; wì jah broq jàn Haq; cla Haq òi ti wì ma jah 'màng aih Haq Boc Plình da wì. <sup>4</sup> ‘Haq jah xùt diac mat wì òng dìq loh khi ca mat wì, pi i ca can cachìt, <sup>☆</sup> hadai pi i ca bìac loq mango, loq crò, loq jìq hòm, ma jah 'màng aih rìm bìac adroi aih khi cwa.”

<sup>5</sup> Haq ma ha'ngui ta gèq bùa doi: “Ngan cô, Au broq hlài neo òng dìq rìm ngè bìac!” Haq doi hòm: “Achìh beq, ma jah 'màng aih bàu cô òng ca lùì, aih bàu joq 'nàng.”

<sup>6</sup> Haq doi hòm ca au: “Khi gèh! Au cô Anpha wa Ô-mê-ga, aih baxèm wa atìq lùch. Mangai leq croh ranòng, Au jah yòc diac tamòc can rìh am ca haq òq, aih diac am dech ma broq rìh. <sup>7</sup> Mangai leq ta'blêq, jah nhàn yòc dìq ca hiniq aih am broq xôxech, èh Au broq Boc Plình haq, haq broq con Au. <sup>8</sup> Mahaq 'bài mangai ma ùh hùà, mangai ma ùh lùì, mangai ma òng ca ramòt, mangai jêh mangai, mangai ma tango, 'bài pajàu 'nùt loq creò can kiac, wì ma waiq dua 'mù, wì ma capoch amòng dìq ca wì haq jah òi ta 'bau ùnh 'nang cheò dèh xam dahwèq ngèq tôq, aih bìac cachìt yàng baiq.”

### *Jê-ru-sa-lem Ma Neo*

<sup>9</sup> Mòiq 'bình plình òi ta tapèh 'bình plình ma wê tapèh doi chròng bìac 'mèq ranàc ma atìq lùch, lam trùh haten ca au doi: “Lam ta cô beq, au jah am ca ìh hnoq con mai, aih mai Trìu Con.” <sup>10</sup> Hi khi au jah 'bình plình aih 'ràng au trùh mòiq bôì wang càn ha'nhèq, èh patô ca au phòq

<sup>☆</sup> 21:4 21:4 Êsai 25:8.

hadròih, aih Jê-ru-sa-lem loh enh plình, nòi Boc Plình, <sup>11</sup> i can 'ngah 'ngai lem lình da Boc Plình. Can ca-ah haq xreo 'ngah ta phòq aih tìah ca mòiq pliang ngốc, tìah hmu canaq 'bac òiq jaq, xenh tìah ca gùang. <sup>12</sup> Phòq aih i pagia panàt ha'nhèq càn, i 12 toq ngo, enh 'nhèq ca ngo aih i achìh hiniq, aih hiniq 12 hadròng Is-ra-ên. <sup>13</sup> Panàt pah mat mahì loh i piq toq ngo, pah 'ngeo ca mat mahì loh i piq toq ngo, pah 'ma ca mat mahì loh i piq toq ngo, pah mat mahì mùt i piq top ngo. <sup>14</sup> Panàt phòq cô broq enh 'nhèq i ca 12 toq hmu tanam, 12 toq hmu cô i achìh 12 hiniq, aih hiniq 12 ngai sùq òò da Trùu Con.

<sup>15</sup> 'Bình plình ma capoch tùang ca au, tì haq wê mòiq toq long wêh broq xam wang òòiq wêh phòq, ngo phòq wa panàt phòq. <sup>16</sup> Phòq aih broq da-adàng pôn pah; òàng yôh wa òàng wàu da-adàng. 'Bình plình aih wêh phòq aih xam long wêh jah 1.400 khê sôq, pah dang gat, pah yôh, pah ha'nhèq da-adàng. <sup>17</sup> Haq wêh panàt phòq pah habàu, jah 144 hagat, tiaq maneh mangai, wa hadai tiaq maneh 'bình plình. <sup>18</sup> Panàt broq xam ngốc nhum wang bah, phòq broq xam wang 'nàng hliang tìah ca gùang. <sup>19</sup> Xèm da panàt rìm nòi jah padì xam rìm hiniq hmu ma òiq jaq canaq, tanam mòiq broq xam ngốc nhum wang bah; ma baiq xam ngốc xenh; ma piq ngốc taboc; ma pôn ngốc xenh nget, <sup>20</sup> ma padam, ngốc taboc, ma tadràu, ngốc gòh bah, ma tapèh, ngốc nhum nget bah, ma rahem, ngốc nhum nget wang, ma hachìh ngốc gòh bah, ma 10, ngốc nget i teo achìh gam, ma 11, ngốc nhum crôch, wa ma 12, ngốc gòh ngùi. <sup>21</sup> Mòiq jàt baiq toq 'màng ngo broq xam 12 toq ngốc poq, rìm toq 'mang ngo aih broq xam mòiq toq ngốc apom, trong ta phòq broq xam wang 'nàng lem tìah ca gùang hliang.

<sup>22</sup> Mahaq òi ta aih au ùh i hnoq hnem cùh waiq leq, ma jah 'màng aih Chuaq Boc Plình Chuaq I Cwàng Itai Òiq

Dǒng wa Trìu Con, aih hnem cùh waiq da phôq. <sup>23</sup> Phôq cô hadai ùh nhet ca mat mahì loq mat khê òiôiq xreo 'ngah, ma jah 'màng aih can 'ngah 'ngai da Boc Plình xreo 'ngah, wa Trìu Con broq ðen da phôq aih. <sup>24</sup> Mangai jàn ma ǒi ta rìm Diac jah cadiang lam ǒi ti can 'ngah phôq cô. 'Bàì bùa ǒi crǒng taneh 'ràng 'ngah 'ngai lem lình dadeh mùt ta aih. <sup>25</sup> 'Bàì ngo phôq dahì ùh clenh, ma jah 'màng aih ǒi phôq cô ùh i damang. <sup>26</sup> Wì haq 'ràng bìac 'ngah 'ngai lem da rìm Diac mùt ta phôq aih. <sup>27</sup> Mangai broq bìac ùh hruah, mangai broq bìac dù wa mangai capoch amòng, ùh jah mùt ta phôq cô, mahaq toq 'bài mangai ma khoi achìh hiniq ta Sech Can Rìh da Trìu Con.

## 22

### *Cròng Can Rìh Wa Long Can Rìh*

<sup>1</sup> 'Bình plình patô ca au hnoq cròng diac da can rìh, tiah ca hmu ramong hliang loh enh gèq bùa Boc Plình wa gèq bùa Trìu Con, mùt ta'ne trong phôq. <sup>2</sup> Kenh 'bò cròng diac pah cô pah tau i long can rìh loh plì 12 khê, rìm khê loh plì ma neo, 'bài hla long cô òiôiq broq brêh ca rìm hiniq tôq ca rìm jàn. <sup>3</sup> Ta aih pi i ca bìac waiq hanip hòm. Gèq bùa Boc Plình wa gèq bùa Trìu Con ǒi ta phôq. 'Bàì hapǒng Haq jah patìh Haq. <sup>4</sup> Wì jah hnoq hadrò Haq, hiniq Haq jah achìh ti ngòng wì. <sup>5</sup> Pi i ca damang hòm. Wì haq ùh nhet ca 'ngah ðen loq 'ngah mahì hòm, ma jah 'màng aih Chuaq Boc Plình xreo 'ngah ca wì. Wì haq jah wèq cwàng hloi hloi.

<sup>6</sup> Jò aih 'bình plình doi ca au: “Bàu cô ðang ca lùì, aih bàu joq 'nàng. Chuaq Boc Plình da 'bài mangai capoch thai Boc Plình, khoi thê ðeh 'bình plình loh òiôiq mahno ðeh ca 'bài hapǒng Haq, bìac Haq ma ten trùh.”

<sup>7</sup> “Ngan cô, Au renh trùh, xôq ramõt am ca mangai leq wèq bàu mangai capoch thai Boc Plình ta sech cô.”

<sup>8</sup> Au cô Jon khoi hnoq wa tàng bìac aih. Jò au hnoq wa tàng, au bla-op enh ngìa ca jènh 'bình plình ma khoi mahno bìac aih ca au òoìq au cùh waiq haq. <sup>9</sup> Mahaq haq doi ca au: “Apaq broq 'màng cô. Au hadai broq hapõng 'màng ca ìh wa oh daq ìh, aih 'bài mangai capoch thai Boc Plình, wa 'bài mangai ma loq wèq bàu Chuaq ta sech cô. ìh phai cùh waiq Boc Plình beq.”

<sup>10</sup> Hi khoi 'bình plình doi hòm ca au: “Apaq clep baxìa bàu mangai capoch thai Boc Plình ta Sech cô, ma jah 'màng aih khoi ten trùh jò òìq ca bìac cô loh. <sup>11</sup> Mangai leq ùh ta-atoq, òoìq haq broq hloi bìac ùh ta-atoq, mangai leq amùa amech, òoìq haq broq hloi bìac amùa amech, mangai leq ta-atoq òoìq haq broq hloi bìac ta-atoq, mangai leq hadròih, òoìq haq broq hloi bìac hadròih.”

<sup>12</sup> “Ngan cô, Au renh trùh, 'ràng bìac baha lam tiaq òoìq am ca rìm ngai, tiaq dèh bìac broq da wì haq. <sup>13</sup> Au cô Anpha wa Ô-mê-ga, aih yi adroi hadai yi atìq, Au cô Baxèm wa Pulùch.”

<sup>14</sup> Xôq ramõt am ca 'bài mangai rùh dèh eo waq ca wì i cwìang trùh nòi long can rìh, jah mùt ango phòq. <sup>15</sup> Enh gùng, aih òìq ca mangai ma bu dàng coq, pajàu 'nùt loq creo can kiac, tango anang, jèh mangai, wa òìq ca 'bài mangai ma loq enh capoch wa broq òìq ca bìac amòng.

<sup>16</sup> “Au cô Chuaq Jêxu, Au khoi thê dèh 'bình plình Au lam trùh thê haq anoi hlài bìac cô ca ìh òoìq am ca òìq ca Tagop Hadròih. Au cô hadròng hadrech da Đawit, Halõng Daxroq Xreo 'Nghah.”

<sup>17</sup> Yiang Hadròih wa con mai Trùu Con creò, doi: “Lam trùh ta cô beq!” Mangai leq ma tàng, thê haq hadai wiang doi: “Lam trùh ta cô beq!” Mangai leq croh ranǒng, thê haq trùh; mangai leq enh, thê haq nhàn yǒc ôq diac can rìh, aih diac khoi am dech.

*Bàu Pulùch*

<sup>18</sup> Au pa'yèp ca pì rìm ngai ma tàng bàu da mangai capoch thai Boc Plình ta sech cô, tàng mangai leq am tam bàu leq mùt ta sech cô, èh Boc Plình jah am tam ca mangai aih bìac 'mèq ranàc ma khoi achìh ta sech cô. <sup>19</sup> Tàng mangai leq cađac bàu ta sech capoch bàu Boc Plình cô, Boc Plình jah yǒc cađac phàn da haq enh long can rìh, wa ta phòq hadròih, 'màng ca sech cô khoi achìh.

<sup>20</sup> Haq ma capoch hlài bàu cô doi: “Joq Au renh trùh.”

Amen. Waiq Chuaq Jêxu renh trùh.

<sup>21</sup> Waiq xìn bìac am dech da Chuaq Jêxu Crich òi ti rìm ngai. Amen.

Sech Hadròih  
Sech Hadròih

Copyright © 2020 Wycliffe Bible Translators, Inc.

Language: Hre

Contributor: Wycliffe Bible Translators, Inc.

Published: 2015 Nhà Xuất Bản Tôn Giáo  
All rights reserved.

2020-11-17

---

PDF generated using Haiola and XeLaTeX on 11 Feb 2021 from source files dated 10 Feb 2021

e5023a07-9831-5256-a315-1cae0f33043d